

# *YINKI KELE KUBENDA*

## *YAYI NA ZULU YA MONGO?*



Kwikila kaka, kwikila kaka,  
Mambu nionso ke salama, kwikila kaka.

Beto kulumusa bayintu ya beto ntangu yayi.

Tata Nzambi, yina kele kisambu ya beto ya kieleka na nokokila yayi, na kumonaka nyonso yina Nge ke na kusalaka samu na bantu na kilumbu yayi. Mpe beto ke lomba Nge, Mfumu, ti beto kwikila kaka, kwikila kaka ti Yawu kele Kieleka, Ndinga ya kusonama yina me monisama na beto. Pesa bima yayi, Tata.

<sup>2</sup> Ntangu yayi na nokokila yayi beto zola kutonda Nge samu na Nsemo yina Nge losaka na zulu ya Masonuku samu na beto na suka yayi. Mpe beto ke sambila na nokokila yayi, Mfumu, na ndonga ya bisambu yina, ti Nge ke siamisa ti Ndinga ya Nge kele Kieleka.

<sup>3</sup> Beto ke sambila samu na bayinzo-Nzambi nionso mpe mabuundu nionso yina me vukana pene-pene ya mwa ba-microphone bisika nionso, na yinza, tii kuna na Côte Ouest, tii kuna na myongo ya Arizona, kuna na bisika ya lepele ya Texas, kuna na Côte Est, bisika nyonso na yinsi, Mfumu, kisika bawu me vukana. Bangunga mingi ke kabula beto, na kati ya ntangu, kasi, Mfumu, beto kele kintwadi na nokokila yayi mutindu kimvuka mosi, ya bakwikidi, yina ke vingila Nkwizulu ya Mesiya. Beto ke sambila, Tata ya Mazulu, ti Nge ke fidisa Yandi ntama mingi ve samu na Dibundu ya Nge. samu ti beto me lomba yawu na Nkumbu ya Yandi. Amen.

<sup>4</sup> Beno lenda vwanda. Mbote ya buklisto na bantu nyonso yina kele awa na nokokila yayi. Mu ke na kyadi ti beto kele ya kukangama mpe ya kutentama ti beto lendaka kupema na mpasi. Ata ti ya kele na ba-climatiseur, ata ti bima ya mupepe kele, ya ke sala ve kieleka kisalu mingi, samu ti bantu kele mingi. Kana ya vwandaka kaka dibundu ya mumesanu ya kufuluka na bantu, ba-climatiseur yina zolaka ke kangamisa beno. Kasi ntangu yayi muntu nyonso kele na kipaka-paka, ke na kutulaka mupepe mpe ba-climatiseur ke na kusalaka na ngolo nionso mutindu ya lendaka.

<sup>5</sup> Beto ke tinda mbote kubanda na Côte Est tii na Ouest, na bankundi ya beto nyonso na Klisto, bayina ke na kuwa. Beto ke tinda mbote na San José, na Mpangi Borders, kimvuka yina kele kuna. Beto ke tinda mbote kuna na myongo, na Prescott, na Arizona, na Mpangi Leo Mercier mpe kimvuka ya yandi yina kele kuna ke na kulingila Nkwizulu ya Mfumu. Beto ke tinda mbote

na bayina kele na Tucson, bayina me vukana na nkokila yayi, na kuvingilaka Nkwizulu ya Mfumu. Kuna na Houston, na Texas, samu na bayina ke na kuvingilaka Nkwizulu ya Mfumu. Kuna na Chicago, na bayina ke na kuvingilaka Nkwizulu ya Mfumu. Kuna na Côte Est, na New York mpe na Connecticut, mpe na bimvuka ya nene kuna na zulu, yina ke na kuvingila Nkwizulu ya Mfumu. Beto kele ve na kisika awa samu na kuvwandisa bawu, na yina beto fwana kaka kufidisa bawu Ndinga na nzila ya allo-allo. Beto ke tinda mbote na Mpangi Junior Jackson na nkokila yayi, mpe kimvuka ya yandi kuna na Clarksville. Mpangi Ruddell, kuna na 62, mpe na kimvuka ya yandi, yina ke kuvingilaka Nkwizulu ya Mfumu. Mpe beto me vukana awa na nkokila yayi na yinzo-Nzambi ya beto, na tabernacle, na kuvingilaka Nkwizulu ya Mfumu.

<sup>6</sup> Mpe ntangu yayi, mingi ya beno mu banza vwandaka ve na balukutakanu na suka yayi. Kasi mu ke na kivuvu ti muntu nyonso, yina vwandaka ve, ke baka bande yina, samu ti mu ke kwikila ti ya vwandaka Nsangu ya kulutila kusungama na dibuundu katuka Nsangu ya *Batata, Wapi Ntangu Ya Kele?* Mu kuwaka kupakulama ya Mpeve, mu twadisamaka na kutuba yina mu salaka. Ya vwandaka yinda, kasi mu kuwaka lutwadusu na kusala yawu. Mpe mu banza ti Mfumu, na nzila ya Ndinga ya Yandi, lakisaka ti wapi ngunga beto ke na kuzinga. Mpe beto vwanda ya kieleka ti beto ke bakula bima yayi ya mansweki yina ke na kusalama. Beno zaba, Biblia ke tuba, “Bantu ya ndwenga ke bakula.”

<sup>7</sup> Kasi bayinsi mpe bantu ke kuma “ya kulemba mingi mpe ya ndwenga mingi.” Beno banza kaka, muntu ya Amerika ya kati-kati kele ntangu yayi na mvula ya kukula, pene ya bamvula makumi zole, ya kulemba mingi kasi ya ndwenga mingi. Bawu vwandaka ve na ba-avion ya reaction na bilumbu yina, mpe—mpe masasi ya atome, kasi bawu vwandaka zinga mingi. Beto ke na kulemba mingi mpe ndwenga mingi, mpe ndwenga ya beto mosi kele yina ke bebisa beto. Beto ke kukibebisa beto mosi. Nzambi ke bebisa beto ve; ndwenga ya beto ke bebisa beto. Ya ke vwandaka ntangu nyonso mutindu yina, mpe mutindu mosi ya ke vwanda dyaka.

<sup>8</sup> Ntangu yayi, kana Mfumu zola, Lumingu ke kwisa na suka, mu zaba ve ntangu yayi yina mu ke tubila, kasi mu ke na kivuvu ti Mfumu, kana Yandi bika beto kuzinga mpe kima mosi ve kusalama, mpe ya vwanda luzolo ya Yandi, beto zola tubila Nsangu yankaka na Lumingu ke kwisa na suka, beto ke sambila samu na bambevo Lumingu ke kwisa na nkokila. Na yina mu fwana kuvutuka na yinzo na Arizona, samu na kuvutula dibuta na mutindu ti ba lendaka sonika bana na lukolo. Na yina beno ke vwanda. . . Beto ke sonika na beno, kaka mutindu beto lenda, samu na balukutakanu mutindu yawu ke landila, to

bantangu yina beto . . . bisika yina beto ke zola kuvwanda. Na yina, Nzambi sakumuna beno nionso.

<sup>9</sup> Ntangu yayi na nkokila yayi, na kuzabaka ti ya kele . . . Mu me luta baminuti kumi na tanu, na kubanda, baminuti kumi na tanu me bikana tii kukuma ngunga ya nana awa na Jeffersonville; mpe ya ke bikana minuti kumi na tanu tii na kukuma na ngunga ya yivwa kuna na Côte Est, mpe kuna ya kele pene ya ngunga tanu na Côte Ouest. Na yawu ntangu yayi beto kele kaka pene ya kudinda ya mwini awa. Mpe mu zola kuzonza na beno samu kaka na kisalumu ya nkufi, samu na kumeka na kuzwa kupakulama ya Mpeve, mpe na manima kubokila ndonga ya bisambu.

<sup>10</sup> Mpe mu zola dibuundu awa, mutindu dibuundu me vukana na bisika yankaka, na kuzwa muntu mosi, mpangi mosi ya bakala yina ba me pakula na Mpeve; mpe ntangu beto ke banda na kusambila samu na bambevo, beno ke tentika maboko na zulu ya bayina kele na kati ya dibuundu ya beno. Beno bambuka moyo, Nzambi kele yina kele bisika nionso; Yandi kele bisika nionso. Na yawu, kuna na Texas, kuna na Californie, kuna na Arizona, bisika nionso beno kele, beno tentika maboko na zulu ya bayina kele ya kubela ntangu beto ke banda na kusambila samu na bambevo. Mpe mu ke kwikila ti Nzambi ke kuwa mpe ke pesa mvutu na kisambu.

<sup>11</sup> Kima ya ngitukulu, Lumingu me luta na nkokila, mpe kupakulama vwandaka landila, mpe Mpeve-Santu . . . Ya vwandaka kaka kima mosi. Mu vwandaka ve na ndonga ya kuswasikisa mabanza bangonda mpe bangonda, kubanda mu vwandaka awa na ntangu yina. Mpe na manima kukwenda kuna na yisi ya nsilulu . . . Beno zaba ve ti Yandi ke sala yawu. Beno lenda ve kutuba ti Yandi ke sala yawu. Beno fwana kwenda kaka kuna mpe kuvingila. Yandi kele na kimpwanza. Yandi ke salaka yina Yandi zola. Kasi beno telama kuna mpe beno vingila na kumona yina Yandi ke sala, na yina kuwa Yawu kunata beno mutindu yina.

<sup>12</sup> Mpe na nsuka ya lukutakanu, na kuzabaka ve nani yawu vwandaka, kasi ya vwandaka na bakala kisika mosi kuna na ndonga yina vwandaka ya nene, mpe na dibandi na zulu, mpe yandi vwandaka muntu mosi ya kubela mingi.

<sup>13</sup> Mpe kuna kaka na nsuka, ya vwandaka na bakala yina monikaka awa na estrade, mpe yandi vwandaka na yintu ya kukulumusa, mpe monanaka ti yandi vwandaka mutindu yandi vwandaka ya kubela, yandi vwandaka simba na kifundu ya yandi. Mpe mu banzaka ti ya fwana vwanda bakala ya ntete yina to bakala ya zole, to yina ntangu yankaka yina mu sambilaka samu na yandi, samu ti yandi vwandaka na dibandi mpe vwandaka na yintu ya yandi ya kukulumusa na nsi; bakala mosi ya nene, ya kufumbama. Kasi mu talaka bisika nyonso mpe mu monaka bakala yango ya mbote ya kuvwanda kuna, kasi

yandi vwandaka sepela. Mu banzaka, “Wapi kisika ya kele?” Mu lendaka ve kutuba kisika ya vwandaka. Mu lendaka kuwa yawu mpe kumona bakala yango na ntwala ya munu.

Mu kuwaka ti ya vwandaka baluka mutindu yayi, mpe ya vwandaka katuka na manima. Mu talaka Mpangi Neville mpe bayayi zole ya kuvwanda awa, ya vwandaka bawu ve. Mu tubaka, “Bakala yayi kele na kati ya kimvuka ya babaptiste yina kuna.” Mpe beno zaba nani ya vwandaka? Mpangi Shepherd. Ya kele samu na yina mu lendaka ve kuzaba yandi, yandi vwandaka ya kuvwanda na manima kuna na yintu ya yandi ya kukulumusa, ke sambila.

<sup>14</sup> Yandi banzaka ti yandi ke kufwa, yandi banzaka yawu na basabala fioti me luta. Kento ya yandi tubaka na yandi na kwenda sumba basapatu ya malu-malu, mpe yandi tubaka, “Mu ke na nsatu ya yawu ve. Mu ke vwanda awa ntangu ya yinda ve.”

<sup>15</sup> Mpe yandi kutanaka na munu kilumbu yina na . . .kuna na zulu ya lupangu, ya Mpangi Wood, ke boka mpe ke kumisa Nzambi. Yandi tubaka, “Mu ke kudya bacon, maki, ba-tomate, nyonso yina mu zola.”

<sup>16</sup> Mpe na kukikumusa nionso yandi pesaka kiti ya yandi, yandi vutukaka kuna na manima na lweka ya nzila, mpe yandi vwandaka sambila. Beno me mona, beno kele ve na nsatu ya kalati ya bisambu, beno kele kaka na nsatu ya lukwikilu. Beno me mona?

Ntangu yayi, mu zabaka ve kana yandi belukaka to ve, mu tubaka kaka, “Bakala mosi, ke sambila, yandi kele na kima mosi ke tambula mbote ve.” Mu banza ti Yawu bokilaka yina yawu vwandaka, “Mpassi ya kifundu, mpe yandi ke sambila na manima awa. Mfumu Yesu me belusa nge.” Ntangu yayi, ya kele nyonso yina mu lendaka tuba. Kubenda vwandaka ti yandi vwandaka sambila. Mu lendaka mona yawu, kasi yina salamaka mu zaba ve. Beno me mona?

<sup>17</sup> Kasi ntangu beno ke kuwa Yawu kuvutuka, muntu nyonso zaba mbote, ntangu Yawu ke tuba, “MUTINDU ME TUBA MFUMU,” beno me mona, ya kele munu dyaka ve ke zonga kuna; ya kele Yandi.

<sup>18</sup> Kasi mu ke tubaka ntangu nyonso, “Yesu Klisto me belusa nge,” ya kele nionso ya Kieleka. “Yandi lwalaka samu na masumu ya beto, na bamputa ya Yandi beto me beluka.” Beno me mona? Beno me mona?

<sup>19</sup> Kasi ntangu Yawu ke kwiza, “MUTINDU ME TUBA MFUMU,” mpe ke tuba na beno yinki ya kusala mpe yina ke salama, beno tala mbote yawu, ya ke vwanda mutindu yina.

<sup>20</sup> Kasi ntangu mu ke tuba, “Yesu Klisto me belusa nge mpe me pesa nge mavimpi ya mbote,” beno ke kwikila yawu, samu

ti Yandi tubaka yawu yimeni. Mu ke vutukila kaka yina Yandi tubaka.

<sup>21</sup> Mpe vision ke na kuvutukila kaka yina Yandi lakisaka. Beno me bakula?

<sup>22</sup> Ntangu yayi ti beto sala nswalu mpe beto kota mbala mosi na Ndinga, samu ti mu zaba ti mingi ya beno kele awa, kele na bakilometele ya yinda na kuzyeta na nkokila yayi. Mu ke sambila ti Nzambi sakumuna beno, kusadisa beno mpe kukeba beno na banzila. Mpe ntangu yayi mu ke zola kubaka na nkokila yayi na Santu Matthieu, kapu 21, mpe banzila 1 tii na 11, na Santu Matthieu. Mpe, ntangu yayi, kana beno kele ve na Biblia ya beno, to kana beno zola kusonika Masonuku yayi, mbote mingi.

<sup>23</sup> Mpe ntangu yayi samu na beno yina me kuwaka ata fioti ve Nsangu ya suka yayi, mpe beno kele na magnetophone; beto ke lombaka ata fioti ve, na kuteka ba-bande. Beto ke lombaka ata fioti ve, kuteka kima mosi. Bantangu yankaka na lukutakanu ya nene ba ke samuna ti ba kele na mwa babuku kuna na manima; beto ke bakaka ve kima mosi na zulu ya yawu. Mpangi Vayle kele musoniki. Ba-bande, bakala yina ke salaka kosalu ya ba-bande kuna ke tuba na beno, beto ke salaka ve mbongo na bande. Beto kele ve. . . Ya kele ve “ba-bande”; ya kele Nsangu. Mpe ntangu muntu ke kota na dibanza ya yandi ti ya kele mbongo, yandi ke sala diaka ve ba-bande. Ya kieleka. Mu vwanda yufula samu na yawu, mu banza ti ba-bande ya beto ke tekamaka pene, na nsi ya ba-dollar tanu, to kima mosi, tatu na tanu, to kima mosi ya mutindu yina. Yinki beno ke tuba? Tatu; mpe yiya, samu na ba-bande yayi ya nene, ya yinda.

<sup>24</sup> Mpe longi mosi, mu yufulaka mosi ya ba-bande ya yandi, mpe ya vwandaka na ba-dollar yivwa, pene ya baminuti makumi zole to makumi tatu, ya nsangu.

<sup>25</sup> Na yawu mu ke mona ti Mpangi ya beto Sothmann na manima kuna me kuma mvwama ve, to mosi na kati ya bawu, na ba-bande yayi yina ba ke—ba ke na kubasisa. Beno me mona, ba ke salaka kaka mingi samu na kuzonzila yawu. Ba lendaka ve kulomba bawu na kusala bawu kima mosi, samu ba fwana kusumba ba-bande mpe nionso yina. Mpe kosalu ya masini kele ntalu mingi, ya ke na ntalu mafunda kumi ya ba-dollar samu na kusala ba-bande yayi, na kubanda.

<sup>26</sup> Ntangu yayi, mu me bakula ntama mingi ve ti mu. . . ba samunaka yawu ntete ve. Kasi ya kele dyaka na kuwaka bande. Konso ntangu beto. . . ba-administrateur, mu ke na kima ya kusala na yawu ata fioti ve. Mu ke vwandaka ve. . . ata fioti ve na mosi ya balukutakanu yina. Kundima ve to—to kumanga ve. Ba ke talisa mabanza ya bawu; ba-administrateur ke baka lukanu nani bakala yina ke landa samu na kusala ba-bande, mpe ba ke tinda yandi mukanda. Yawu yina kaka mu zaba samu na yawu.

Ba ke kipaka yawu, mpe samu ti mu lenda ve kusakumuna ba-bébé to kukipe ba-bande, na yina, to kubotika.

<sup>27</sup> Na yawu mu me tula mabanza ya munu na zulu ya Nsangu yayi, ya kele Kubenda ya Tatu yina, mpe ya kele na yina mu fwana vwanda ya kukwikama mpe ya luzitu.

<sup>28</sup> Matthieu 21:1 tii na 11. Mu tubaka yawu samu ti beno lendaka kutala mbote . . . to kubaka yawu na Masonuku.

*Mpe ntangu . . . Mpe ntangu bawu kumaka pene-pene ya Jérusalem, mpe kumaka na Bethphagé, na mongo ya ba-Olivier, . . . Yesu fidisaka bilandi ya yandi zole,*

*Mpe na kutubaka na bawu, Beno kwenda na bwala yina kele na ntwala ya beno, mpe beno ke mona kuna mpunda ya kento ya kukanga, mpe mwana ya mpunda ya bakala na yandi: beno zibula bawu, mpe beno nata bawu na munu.*

*Mpe kana muntu tuba na beno, beno ke tuba, Mfumu kele na nsatu ya bawu; mpe na mbala mosi yandi ke bika bawu kwenda.*

*Nyonso yayi salamaka, ti ya fwana kulungisa yina profete zonzaka, na kutubaka,*

*Beno tuba na bana ya bakento ya Sion, Tala, Ntinu ya nge ke kwisa na nge, na lembami, . . . ya kuvwanda na zulu ya mpunda ya bakala, mwana ya mpunda ya kento.*

*Mpe bilandi kwendaka, mpe salaka mutindu Yesu tumaka bawu,*

*Mpe bawu nataka mpunda ya kento, mwana ya mpunda ya bakala, mpe tulaka na zulu ya bawu bilele ya bawu, mpe bawu tulaka yandi na zulu ya yawu.*

*Mpe nkonga ya nene ya bantu vwandaka tanda binkuti ya bawu na nzila; mpe bayankaka vwandaka zenga mavala na bayinti, mpe vwandaka losa yawu na nzila.*

*Mpe nkonga ya bantu yina vwandaka tambula na ntwala, mpe yina vwandaka tambula na manima ya Yesu, vwandaka boka, na kutubaka, Hosanna na mwana ya David: Bika Mfumu kusakumuna muntu yina ke na kukwisa na nkumbu ya Mfumu; Hosanna kuna na mazulu.*

*Mpe ntangu yandi kotaka na Jérusalem, mbanza nionso ninganaka, mpe bantu vwandaka yufula, Nani kele muntu yayi?*

*Mpe nkonga ya bantu tubaka, Yayi kele Yesu profete ya Nazareth ya Galilée.*

<sup>29</sup> Ntangu yayi kana mu lendaka baka dilongi mosi na yawu, baminuti makumi tatu ntete ndonga ya bisambu kubanda, Mu

ke zola kubaka yayi mutindu dilongi: *Yinki Kele Kubenda Yayi Na Zulu Ya Mongo?*

<sup>30</sup> Ntangu yayi, ya vwandaka kilumbu ya kulemba mingi, ya kidi-kidi, mpe ya vwandaka kilumbu ya mumesanu ve. Beto ke mona Yesu awa kukwiza na Jérusalem, ya kukubama samu na paki. Mpe paki kele kisika mwana-dimeme ya paki kufwaka, mpe menga vwandaka mwangana na zulu ya kiti ya kyadi samu na kukatula-masumu samu—samu na bantu. Mpe Yandi katukaka na Bethphagé mpe kwisaka na zulu ya Mongo ya ba-Olivier, yina ke tala na zulu ya mwa mongo yankaka kisika ba tungaka Jérusalem. Mpe mutindu Yandi talaka, mpe zabaka ti yayi vwandaka kutalana ya Yandi ya nsuka.

<sup>31</sup> Yayi vwandaka ntangu yina ba zolaka kaba Yandi na maboko ya bantu ya masumu mpe bawu zolaka kufwa Yandi. Yandi zolaka kufwa lufwa ya kulutila yimbi yina me kufwaka ntete ve muntu yina ke kufwaka, mpe ba ke zika yandi. Ba ke yekula yandi na bantu ya Yandi Mosi, bayankaka ya bawu vwandaka kuna kaka na Yandi. Mpe Yandi, na kuvwandaka Nzambi, zabaka yina vwandaka na kati ya bantima ya bawu, mpe zabaka kubanda na mbandukulu nani ke yekula Yandi. Mpe zabaka ti muntu yina vwandaka na Yandi yina vwandaka na lweka ya Yandi mpe vwandaka tanga mbongo ya Yandi samu na Yandi, mpe nyonso yina, zabaka ti muntu yina ke yekula Yandi. Mpe yandi zabaka ti kulunsi mosi ya nkú ya Rome vwandaka vingila Yandi kuna. Yandi zabaka ti masa ya Yandi na kati ya nzutu ya Yandi mpe Menga ya nzutu ya Yandi ke kabwana, mpe ti Menga ke kulumuka na mbunzu ya Yandi, na matangá ya nene mingi mutindu mutoki. Yandi zabaka nyonso yina vwandaka na ntwala ya Yandi. Mpe Yandi telamaka na zulu ya mongo, na kutalaka na Jérusalem.

<sup>32</sup> Bantu ya kilumbu yina, . . . yina bawu bokilaka kilumbu yina, “kalasi ya misambidi ya kulutila mbote,” yinaka Yandi. Mabuundu ya kilumbu yina yinaka Yandi mpe mangaka Yandi, mpe mengaka bayina nyonso vwandaka kuwa Yandi. Mpe kana bawu kwendaka na ba-campagne ya Yandi, ba vwanda basisa bawu mbala mosi na kubundana ya dibuundu. Kukondwa ntembe ti Masonuku ke tuba, “Yandi kwizaka na bantu ya Yandi Mosi, mpe bantu ya Yandi Mosi yambaka Yandi ve.” Bayina zolaka zola Yandi, bayina zolaka vwanda na Yandi, vwandaka bambeni ya Yandi ya yimbi mingi, bambeni ya kulutila yimbi.

<sup>33</sup> Mpe Yandi salaka mwa kimvuka ya Yandi na kati ya nkonga ya bantu ya bamputu, milobi mbisi, bafutisi mpaku, bantu yina me longokaka ve. Biblia ke tuba ti bantu yankaka na kati ya bawu vwandaka mpe “bantu yina zabaka kima ve, yina longokaka ve.” Bayankaka lendaka mpe ve kusonika nkumbu ya bawu. Yandi kwendaka ata fioti ve na mabuundu samu na kuzwa bantu ya Yandi.

<sup>34</sup> Mpe Yandi ndimaka ata fioti ve bantwadisi ya dibuundu. Mpe, na ngaanda ya yina, Yandi landaka kubendama ya profete. Yandi vwandaka fundisa nyonso yina bawu salaka, mutindu bayina na ntwala ya Yandi salaka; samu ti bawu vwandaka kitini ya Ndinga, mpe Yandi vwandaka Ndinga na muvimba ya Yawu.

<sup>35</sup> Kasi na kati ya nionso yina, na kati ya bansungi nionso mpe profete nionso yina vwandaka to yina zolaka vwanda, ya ke vwanda na lutangu mosi ya bantu yina ba soolaka na ntwala na kuwa Nsangu yina, mpe bawu ke landa Yawu. Bantu yina ke kipake ve nkonga ya bantu. Bawu ke kipaka diambu ve kutonga ya muntu ya kukondwa lukwikilu. Ba—ba ke na mulabu ya kutuba na yawu ve. Bawu kele na kima mosi ya kusala, ya kele kukwikila mpe kuzwa konso kitini ya Yawu bawu lendaka, kukota na Yawu mutindu Marie yina vwandaka ya kuvwanda na makulu ya Yesu.

<sup>36</sup> Mpe Marthe vwandaka yidika madia ya Yandi ya midi, mpe Yesu tubaka na yandi, “Kasi, Marthe, nge ke na kiadi mingi samu na bima ya luzingu, kasi Marie sosaka bima ya kulutila mbote,” beno me mona, bima ya Luzingu ya Kukonda nsuka.

<sup>37</sup> Ntangu yayi, beto ke mona ti bantu mingi yina bakulaka. . . Ba vwandaka ve na mikanda mutindu beto ke na yawu bubu yayi, ba vwandaka ve na televizyo to allo-allo, to kima mosi, na kilumbu yina, kasi ya vwandaka na manguni-nguni ti Yandi zolaka vwanda na paki. Samu ti bantu mingi, na kuvwandaka ya kimpeve, zabaka ti Yandi vwandaka Mwana-dimeme ya Paki, samu ti Yandi tubaka yimeni na bawu bima yina zolaka salama.

<sup>38</sup> Mpe kuna, ya kieleka, na kuzabaka ti Yandi zolaka vwanda kuna, mpe zolaka Yandi mutindu bawu salaka, bawu vwandaka vingila Yandi. Ya vwandaka na nkonga ya bantu yina vwandaka kieleka kupusa, kutindika na kielo mosi na yankaka, ba vwandaka tala kuna na mutindu nyonso, samu ti bawu zabaka ti mosi ya bangunga Yandi ke monika. Bawu vwandaka tala mbote.

<sup>39</sup> Bayankaka vwandaka kukiyufula yinki vwandaka diambu na bantu yayi vwandaka kwenda mbangu na mwelo. “Yinki kele kubenda yayi?”

<sup>40</sup> Mpe bawu vwandaka tala mutindu *yayi* mpe vwandaka tala mutindu *yina*, samu na kumona. Ya monanaka ti bawu vwandaka sosa kima mosi, na nsi ya kuingila ti kima mosi ke salama.

<sup>41</sup> Oh, wapi mutindu mu ke zola kusoba dilongi ya munu na mwa ntangu fioti mpe kutuba yayi, ti yawu yina diambu bubu yayi. Bantu yina ke na kuingila nkwezulu ya Yandi kele na nsi ya kuingila ya nene mpe ke na kutalaka. Beto lenda kuwa yawu, kubenda yango. Mpe bawu ke na kusosaka, ke na kutalaka mbote konso kuningana mpe konso kidimbu, ke na kufwanikisa yawu na Masonuku.



42 Mpe ntangu bawu monaka bima yina nionso ba zabisaka na ntwala samu na Yandi, tii na nsuka, bawu zabaka ti nsuka me belama. Bawu zolaka kuvwanda kuna, na yawu bawu vwandaka tala mbote. Ndambu ya bantu vwandaka samu na Yandi, na lutangu ya fyoti. Bayankaka vwandaka telemina Yandi, mingi ya bawu, makumi yivwa na zulu ya nkama vwandaka telemina Yandi.

43 Mpe ya kele mutindu yina bubu yayi na kati ya nkonga ya misambidi, ntangu ya me kuma kieleka na Ndinga mpe Klisto, ya kele na kutala mosi na zulu ya nkama yina ke kwikila Yawu. Ndambu yankaka zolaka sala ve bukebi na Yawu, ata ti nionso yina salamaka, ba vwandaka seka to vwandaka vweza Yawu. Kaka mutindu mosi. Ntangu, bima ke sobaka mingi ve, disolo ke vutukilaka kaka ntangu nionso.

44 Mbote, beto ke mona ti ya vwandaka nata tension ya kidi-kidi. Ya zolaka salama. Ya fwana sala yawu. Ba vwandaka vingila, ba vwandaka kukiyufula yina Yandi zolaka sala ntangu Yandi ke kuma kuna. Bawu zolaka kuvwanda kuna samu na kuzwa kima nionso yina Yandi zolaka sala. Bawu zolaka Yawu. Bawu zolaka kumona Yawu. Bawu kwikilaka Yandi. Bayankaka kuwaka ti Yandi vwandaka kwiza, mpe bawu kwendaka kuna samu na kuseka Yandi. Na yina na manima ya kuvingila nionso ya kidi-kidi, kilumbu ya kuswaswana, ntangu ya kuswaswana, mabuundu vwandaka ya kulala, ba-nerf ya bantu vwandaka ya kubendana, ya vwandaka na bantu mingi kuna, mpe na manima yawu salamaka!

45 Na zulu ya Mongo ya Olive me kwiza mwa mbuluku mosi, ya mpembe, yina vwandaka kulumuka na mongo, na kimvuka ya bantu yina vwandaka boka na bufanatiki, vwandaka benda mandalala na bayinti, na kulosaka bilele ya bawu na nzila, na kubokaka, “Hosanna na Mwana ya David yina ke kwiza na Nkumbu ya Mfumu!” Mwa mulet yayi, Munati-mpunda ya yandi vwandaka yankaka ve kasi Mesiya ya Nzambi yina me pakulama ya ngunga yayi.

46 Nzambi, na ntangu yina, yinki Yandi vwandaka sala? Yinki kele kubenda yina kuna na zulu ya mongo? Ya kele Nzambi ke na kusala disolo, mpe Nzambi ke na kulungisa profesii. Mpe ya ke nataka ntangu nyonso kubenda ya nene. Ya ke zangula kutonga nyonso, bangoyi-ngoyi (ya Nsangu ya suka yayi), mpe bangononi dyaka. Beno me mona? Bawu vukanaka samu na kutala yina ke salama. Bantu yankaka kwisaka samu na kuzaba, bantu yankaka kwisaka samu na kumona foti, bantu yankaka kwisaka samu na kusawula. Ya kele na mitindu nyonso vukanaka, mutindu beto me tuba na suka yayi: mikwikidi, mikwikidi ya kati-kati, mpe bantu ya kukondwa lukwikilu. Yinki kele na zulu ya mongo? Profesi me lungisama. Ntangu yayi beto ke mona yina ke salama.

47 Ntangu yayi, na Buku ya Zacharie, na kapu 9 mpe na nzila ya 9. Zacharie, mosi ya baprofete, zonzaka na Kimpeve, na kutubaka yayi.

*Beno sepela mingi, O bana ya bakento ya Sion; beno boka, O bana ya bakento ya Jérusalem: tala, Ntinu ya nge ke na kwiza na nge: yandi keke kaka, . . . na mpulusu; yandi keke ya kukikulumusa, yandi me mata na zulu ya mpunda, na zulu ya mwana ya mpunda, mwana ya mpunda.*

48 Ntangu yayi, yinki vwandaka diambu na misoniki yina? Yinki vwandaka diambu na banganga-Nzambi yina? Yinki vwandaka diambu na misambidi yina? Yayi vwandaka ya kusonika bamvula bankama yiya na makumi nana na sambwadi ntete ya salama, na nzila ya profete yina me siamisama, mpe ba tulaka yawu yimeni na bisono mpe ba bokilaka yawu Biblia, barouveau ya Ngwisani ya Ntama. Samu na yinki bawu monaka ve ti ya keke profesi yina me lungisama? Ya keke samu na yina bawu lenda ve kumona yawu bubu yayi. Bawu bakaka Ndinga ya Nzambi mpe salaka ti Yawu kusala kisalu ve na bantu, na kulongaka (samu na binkulu) samu na Malongi binkulu ya bantu.

49 Mpe kana musoniki, milongisi, milongi, bantu ya kimpeve (mutindu ba ke bokilaka bawu), bapakulami, zolaka tanga kaka Biblia, ba zolaka ve kukiyufula yina ke salama, ba ke zaba yina Yawu keke. Nzambi keke na kulungisaka Ndinga ya Yandi!

50 Disolo vwandaka salama, profesi vwandaka lungisama. Mpulusu samu na yinza vwandaka ke kwiza, kilumbu ya nene yina baprofete nionso monaka na ntwala. Bayina nionso vwandaka na ntoni vwandaka vingila kilumbu yina (oh, beno banza na yawu), bayina nyonso kufwaka, bantu nyonso ya kudedama yina basisaka menga mutindu bambangi mpe baprofete.

51 Na yina, Yandi bokaka kaka, “Jérusalem, O Jérusalem, nge yina losaka matadi na baprofete nionso yina mu ke tindaka nge, mpe ke kufwa bantu ya kudedama, bambala yikwa mu zolaka kuvukisa nge na nsi ya mapapu ya Munu mutindu nsusu ya kento ke salaka, ke bumbaka bana ya yandi, kasi nge me zola ve. Kasi ntangu yayi ngunga ya nge me kwisa.”

52 Nyonso yina vwandaka na ndyamu, Abraham, Isaac, Jacob, baprofete nyonso, vwandaka vingila ngunga yayi.

53 Mpe dibuundu vwandaka ya kufwa meso na Yawu. “Nani keke yayi yina ke na kusalaka makelele nyonso yayi? Nani keke Muntu yango?” Bawu tubaka kilumbu mosi, “Yina keke ve mwana ya kisadi-mabaya kuna? Beto zaba Yandi. Wapi kisika Yandi kuzwaka ndwenga yayi? na yina, beto ke mona Yandi ve na ngwisani na mosi ya balukolo ya beto. Beto zaba ve babuku yina Yandi longokaka. Nani Yandi keke?”

54 Yandi vwandaka mvutu ya profesu ya profete. Yandi yayi ke kwisa, ke tambula na zulu ya mwana ya mpunda. Wapi mutindu ya kubenda! Nzambi vwandaka lungisa Ndinga ya Yandi ya nsilulu, ngunga yina ba vwandaka vingila kubanda bamvula mafunda yiya. Na Genèse, kapu ya 3 mpe nzila ya 15, Nzambi salaka nsamunu na ntwala, “Nkuna ya kento ke diata yintu ya nyoka, kasi yintu ya yandi ke tatika kinkoso ya yandi,” profesu yango na kati ya Biblia ba zabisaka yawu na ntwala samu na nkwezulu ya Bakala yayi.

55 Mpe awa ntama mingi ve ti ya vwandaka na profete mosi yina telamaka na kati-kati ya bawu, yina vwandaka profete yina ba siamisaka, Zacharie, mpe yandi tubaka, ti, “Beno bana ya bakento ya Jérusalem mpe beno bana ya bakento ya Sion, beno sepela, beno boka, beno sala makelele, samu Ntinu ya nge ke kwisa na nge, ya lembami mpe na nsi mpe ya kukikulumusa, yandi me mata na zulu ya mwana ya mpunda.”

56 Mpe awa bantu yango yina tangaka Masonuku yango, kilumbu na manima kilumbu, ba talaka Yandi ke kwisa na zulu ya mpunda, mpe bawu bokaka, “Nani kele yayi?” Beno me mona? Nzambi ke na kulungisa Ndinga ya Yandi na bantu yina zolaka zaba yina Yawu vwandaka, kasi bawu zabaka Yawu ve.

57 Ntangu Nzambi ke lungisa Ndinga ya Yandi, Ya ke nataka ntangu nionso kubenda, ntangu nionso. Ya ke nataka kubenda, samu Ya kele ya mumesanu ve. Na yina ya mumesanu ve, ntangu Yandi ke lungisa Ndinga ya Yandi samu na mutindu ya bilumbu yayi, samu ti mutindu ya bilumbu yayi ke kwikilaka ve na Yawu. Bawu kele na mutindu ya bawu mosi.

58 Ntangu yayi, beto ke mona, mpe beto vutuka na Masonuku mpe beto baka mambu yankaka ya mumesanu ve, kaka samu na baminuti fyoti dyaka, ntangu Nzambi lungisaka profesu ya Yandi. Ntangu Nzambi tubaka kima mosi, Yandi ke sala yawu. Mazulu mpe ntoto nyonso ke luta, kasi Ndinga yango lenda luta ata fioti ve. Na yawu Yawu ke nataka ntangu nyonso, dyambu ya mumesanu ve.

59 Beno tala wapi mutindu buzoba ti Ndinga ya Nzambi me kwisa na bantu yina zolaka kwikila Yawu, mpe kasi Ya kele mingi ya mumesanu ve ti bawu ke boka, “Mbote, yinki yayi? Wapi kisika beno me kuzwa kima yina? Nani kele yayi? Yinki yayi kele?”

Na yina, ba zolaka boka, “Hosanna na Ntinu yina ke kwiza na Nkumbu ya Mfumu!” Kasi ya vwandaka kaka na mwa kimvuka mosi yina vwandaka sala yawu, kaka mwa kimvuka mosi ya fioti.

Bamvula mafunda yiya ya profesu, samu na kima ya kulutila nene yina lendaka salama na yinsi, samu ti kivuvu nyonso ya bantu ya kufwa vwandaka na zulu ya Yawu, bilumbu nyonso na ntwala vwandaka na zulu ya Yawu; mpe misambidi,

yina vwandaka tuba ti bawu ke kwikila Yawu, ba vwandaka boka, “Nani Ya kele? Mpe yinki kele kubenda yayi?” Kima ya mumesanu ve! Kaka mutindu mosi, ya ke sobaka ve, ntangu yayi ya mumesanu ve.

<sup>60</sup> Beto tala mwa bima ya mumesanu ve, mutindu mu vwandaka tuba. Yinki vwandaka kubenda kaka na ntwala lufundusu kubula yinza mpe kubebisa yawu na nzila ya maza? Kiboba mosi ya bakala, pene-pene ya bamvula nkama mosi na makumi zole, vwandaka tunga masuwa na ntangu masa vwandaka ve samu na kunata yawu. Bamvula mingi kuna na zulu, yandi vwandaka kuna na kielo, yandi vwandaka sala ngolo samu na kutunga na kati, na kati, yandi vwandaka pangusa budimbu na kati mpe na ngaanda, mpe vwandaka tuba, “Yinza ke dinda na maza,” nsungi ya nene ya science.

<sup>61</sup> “Yinki kele kubula yina na zulu ya mongo kuna?” “Oh, ya kele bakala ya kiboba na nkumbu ya Noé, mpe yandi kele kuna, kiboba ya fanatiki. Bakala ya kiboba yayi telamaka na mwini ntangu ya yinda. Yandi kuzwaka ndungutila na kati ya nzutu. Yandi kele na mabanza ya mbote ve. Mpe yandi ke na kutunga yina yandi ke bokilaka ‘nzaza,’ mpe yandi ke na kutuba ti bamasa ke kulumuka kuna na zulu kisika masa kele ve, mpe ya ke nata na zulu ya yawu bantu nionso na nziunga; mpe muntu nyonso yina ke kuwa ve nsangu ya yandi, mpe muntu nyonso yina ke kota ve na nzaza yango, ke kufwa. Beno me kuwaka ntete kima ya mutindu yina?” Ya vwandaka kubenda ya mumesanu ve!

<sup>62</sup> Mu banza ntangu bantu vwandaka zola kuseka ya mbote, bawu vwandaka mata kuna mpe vwandaka telama na ntwala ya kielo ya nzaza mpe vwandaka seka. “Oh, nge tubaka ti mvula ke noka bamvula nkama mosi me luta! Nkooko ya bakala tubaka na munu ti yandi kuwaka nge na zulu awa ke tuba ti mvula ke noka, mpe nge ke na kubula dyaka na kitini ya yinti yayi ya ntama awa. Samu na yinki nge ke vutula ve mabanza ya nge ya mbote?”

<sup>63</sup> Kasi ya vwandaka Nzambi ke na kukubama samu na kusiamisa nsilulu mpe samu na kulungisa profesu yina profete ya Yandi salaka. Kaka ya mumesanu ve! Nzambi ke na kulungisa nsilulu ya Yandi na Noé, na yina bayankaka vwandaka seka. Nzambi vwandaka mpe kukubama samu na kusala disolo samu na katalisa na bantu yankaka, ata mpe bubu yayi, ti Yandi ke zitisaka Ndinga ya Yandi! Ata ti ya ke monana ya kieleka ve, mpe ya ke wakana mbote ve, Yandi ke zitisaka kaka Ndinga ya Yandi. Yandi vwandaka sala yawu mbandu mosi, kiboba ya bakala yayi vwandaka kubula na zulu ya nzaza, samu na bantu yayi awa na Amerika na nkokila yayi mpe bisika nyonso na yinza. Ata ti yina science ke tuba, yina bawu ke tuba, *yayi, yina, to yankaka*, Yandi ke zitisaka kaka Ndinga ya Yandi. Yandi vwandaka sala disolo.

<sup>64</sup> Yinki vwandaka kubenda kilumbu mosi; kima ya mumesanu ve kusalamaka kuna na ntoto ya kuyuma, mpe ya vwandaka mulaka yina vwandaka na tiya. Mpe profete yina vwandaka

kukima vwandaka ya kutelama kuna na ntoto ya kuyuma. Yandi kuwaka ata fioti ve ndinga mosi, yandi kuwaka ata fioti ve makelele, kasi yandi talaka mpe yandi monaka kima ya mumesanu ve na zulu ya mongo. Nzambi vwandaka meka na kubenda bukebi ya yandi. Mutindu mosi ya kele bubu yayi!

<sup>65</sup> Nzambi vwandaka kubama na kulungisa Ndinga ya Yandi, na nzila ya profete ya Yandi Abraham, “Nkuna ya nge ke zinga bamvula nkama yiya na yinsi ya nzenza. Mu ke basisa bawu na diboko ya ngolo.”

<sup>66</sup> Mpe Yandi vwandaka kukubika muntu mosi samu na kisalu yango, mutindu Yandi vwandaka yidika nzaza samu na kisika ya lukengolo samu na bayina nionso ke kwikila. Nzambi tulaka mulaka yayi na tiya, mpe muvungi yayi, Moise, yandi tubaka, “Mu ke baluka kaka samu na kutala yina kima yayi ya ngitukulu zola kutuba.” Mpe ntangu Yandi bendaka Moise na mulaka yina, Yandi tubaka na yandi.

<sup>67</sup> Yinki vwandaka kubenda ya manima na kati ya kivinga ya Pilate, ntangu muvungi yayi losaka nkawa na ntoto mpe yawu kitukaka nioka? Nzambi vwandaka lungisa nsilulu ya Yandi na Moise. Yinki vwandaka kubenda yayi na Mubu ya Kufwa, ntangu bampunda ya Pharaon vwandaka nyonso na ngitukulu, ntangu bawu monaka mupepe kukulumuka na mazulu mpe ke kabula Mubu ya Mbwaki ndambu na ndambu; mpe nkonga ya bampika ya bamputu, yina vwandaka tambula na kisalu ya Nzambi, vwandaka tambula na makulu ya kuyuma na ntoto ya kuyuma? Yinki ya vwandaka? Nzambi zitisaka Ndinga ya Yandi. Lufwa me kwenda, bantu ya moyo me sabuka; mpe bantu ya kufwa na kimpeve mekaka na kumekula yawu, mpe dindaka. Nzambi ke na kulungisa profesi mpe ke sala disolo. Yina vwandaka kubenda ya Mubu ya Kufwa.

<sup>68</sup> Yinki vwandaka kubenda ya kilumbu ya zole na manima ya yina, na Mongo Sinai, ntangu bantu nyonso kuzwaka lutumu ya kukwiza ve na bakento ya bawu, ntangu ba lombaka bawu na kusukula bilele ya bawu mpe kukisantisa bawu mosi, mpe kuvukana pene-pene ya mongo kisika muntu na nkumbu ya Moise tubaka ti yandi kutanaka na Nzambi na Dikunzi ya Tiya? Mpe Nzambi tubaka na Moise, “Mu ke kulumuka na kati ya bantu. Mu ke siamisa yina mu tubaka na beno, mpe Nani mu kele. Mu ke lakisa bawu ti mu kele Nzambi yina.” Yina vwandaka kubenda, Nzambi ke lungisa Ndinga ya Yandi.

<sup>69</sup> Yinki vwandaka kubenda kilumbu mosi na kati ya disolo, kisika yinsi mosi zimbanaka Nzambi, kisika bantu kumaka ya mambu ya ngaanda mpe vwandaka kipe ve, kisika banganga-nzambi nionso kwendaka na kubenda ya bilumbu yayi, baprofete pesaka profesi landila luzolo ya banganga-nzambi? Mpe na kilumbu yina, mutindu beto, bawu vwandaka na muntu mosi yina bawu banzaka ti vwandaka fanatiki. Yandi vwandaka tubila bakento yina me pakula maquillage, mpe nionso yina, mpe

yandi vwandaka muntu ya mutindu ya ngitukulu. Mpe kiboba yayi kwisaka mpe tubaka na ntinu, “Ata kinoko ke kwisa ve . . . ke kwisa ve tii kuna mu ke bokila yawu.”

<sup>70</sup> Mpe beto ke mona, na manima, ti yandi bumbamaka mpe kwendaka ntama na yawu, mpe yandi bumbamaka na ntoto ya kuyuma kisika mosi kuna. Bankundi ya yandi banzaka ti ya lendaka vwanda ti yandi me kufwa na nsatu ya madia to yandi me kufwa; kasi ba vwandaka kudisa yandi mbote mingi, mpe pesaka yandi maza, dyaka. Mpe awa yandi yayi, me kwisa mpe me tuba, “Nge me mona ti mu kele na MUTINDU ME TUBA MFUMU? Ntangu yayi, kana beno me ndimisama ntete ve, beto kwenda na zulu ya mongo mpe beto talisa nani kele Nzambi,” samu ti yandi kuzwaka vision yankaka katuka na Mfumu.

<sup>71</sup> Yandi tubaka, “Beno sola autel, mpe beno tunga yawu, mpe—mpe beno sola bangombe mpe beno kufwa yawu. Mu ke sala autel ya Mfumu, mpe dyaka mu ke tula bangombe na zulu ya munu. Beto zole ke sala munkayulu, mpe ke bika ti Nzambi yina ke pesa mvutu kuvwanda Nzambi.” Yandi zolaka ata fioti ve kusala yawu kana Mfumu tubaka ve na yandi; yandi tubaka yawu na manima, “Mu me sala yayi na . . . nyonso yayi, na lutumu ya Nge, Mfumu.”

<sup>72</sup> Kasi yinki kele kubenda? Ya kele na banganga-Nzambi nkama yiya ya kutelama na zulu ya mongo, mpe ntinu kele kuna na pusu ya yandi, na binwanunu ya yandi nyonso mpe mikengi ya kutelama na nziunga. Mpe bakala yayi ya kiboba, ya kufuluka na mika, na mika na kizizi, na dibandi na yintu, mpe bansuki vwandaka kulumuka na zulu ya kizizi ya yandi, kitini ya mpusu ya dimeme vwandaka ya kufika pene-pene ya yandi, mpe bansuki vwandaka kufika nzutu ya yandi, yandi vwandaka ya kutelama kuna na nkawa na diboko ya yandi, mpe dibungu ya mafuta na diboko yankaka; yina tubaka kaka, bamvula tatu na ndambu na ntwala ya yina, “Ata kinoko ke kubwa ve kana mu bokila yawu ve, mu ke bokila yawu,” yandi vwandaka baka kisika ya Nzambi, na ba-hallo mpe bivudi, mpe nionso yina ba ke zonzila. “Mpe tala kiboba ya fanatiki yayi yina me telama kuna na zulu ya mongo, na kunataka bantu nyonso yayi kuna na zulu.” Yinki vwandaka kubenda yina? Ya vwandaka Nzambi yina vwandaka kubama na kusiamisa ti profete ya Yandi vwandaka ya kusungama. Ya vwandaka Nzambi vwandaka lungisa profesi. Nzambi mpe ke na kusalaka disolo, ke na kulungisa Ndinga.

<sup>73</sup> Mwa bamvula nkama na manima ya yina, ya vwandaka na muntu yina vwandaka ya kupakula na Mpeve mosi yina, mpe yandi basikaka na ntoto ya kuyuma, yandi vukanaka ve na ba-organisation; ata ti papa ya yandi vwandaka muntu ya organisation, nganga-Nzambi ya musiku. Kasi yandi basikaka na ntoto ya kuyuma, ya kulwata mpusu ya dimeme na zulu ya yandi, bansuki bisika nionso na zulu ya kizizi ya yandi. Na kisika ya vwanda mpembe, ya vwandaka ndombe. Yinki vwandaka

kubenda ya muntu yayi yina bendaka Jérusalem nionso mpe Judée? Bayankaka na kati ya bawu kwendaka kuna mpe tubaka, “Ya kele na muntu ya mfinda kuna. Yandi ke na kumeka na kudindisa bantu na masa. Nani me kuwaka ntete kima ya mutindu yina?”

<sup>74</sup> Bayankaka vwandaka landila, mpe vwandaka tuba, “Yayi fwana vwanda Mesiya.” Mosi ya bawu tubaka, “Ya lendaka vwanda mosi ya baprofete.” Bawu zabaka ve yinki kubanza. Kasi yinki ya vwandaka? Ya vwandaka Nzambi yina vwandaka lungisa Ésaïe 40, kisika Yandi tubaka, “Tala . . .” yina Yandi ke sala na bilumbu ya nsuka, mutindu Yandi ke tinda kisadi ya Yandi mpe yina yandi ke sala.

<sup>75</sup> Na yina beto ke mona, basabala fyoti na manima ya yina, ti muntu yina vwandaka kieleka ya kukwikama na nsangu ya yandi, tii yandi tubaka, “Ya kele na Mosi yina kele ya kutelama na kati-kati ya beno, Yina mu kele ve ya kulunga na kuzibula basapatu ya yandi. Yandi ke botika beno na Mpeve-Santu mpe Tiya, mutindu mu me botika na maza.”

<sup>76</sup> Kilumbu mosi Bakala mosi mutindu muntu nyonso, ya ntwenia, pene ya bamvula makumi tatu, kulumukaka mpe bakaka mbotika. Mpe ntangu Muntu yayi kwizaka, ya vwandaka na kubenda mosi ya mutindu yina na nzila ya profete, profete salaka mambu ya ngitukulu kilumbu yina. Dibuundu lendaka ve kumanga na kutala kisalu ya profete yina.

<sup>77</sup> Ntangu yandi vwandaka sala ntembe na banganga-Nzambi kuna na lweka ya nzadi, bawu tubaka, “Nzambi tungaka autel yayi. Nzambi tubaka na beto na kusala yayi. Moise kele profete. Beto ke kwikila Moise. Munkayulu ke zimbana ata fioti ve.”

<sup>78</sup> Mu lenda kuwa Jean kuvutula mvutu, kutuba, “Beno me tangaka ve na Masonuku yina Daniel profete tubaka, ‘Munkayulu ya konso kilumbu ke zimbana’? Mpe ngunga yina me kuma! Beno me tangaka ve yina Ésaïe tubaka na kapu ya 40, ‘Ndinga ya yandi yina ke boka na ntoto ya kuyuma, beno yidika nzila ya Mfumu’? Ya kele na baprofesi zole samu na munu. Mpe kima yankaka, beno me zaba ve profete ya beto bamvula nkama yiya me luta, Malachie, ntangu yandi zonzaka na kapu ya 3 mpe tubaka, “Tala, Mu ke tinda munati nsangu ya Munu na ntwala ya kizizi ya Munu, samu na kuyidika nzila’? Beno zaba ve ti yayi ke lungisa profesu?” Profesi vwandaka lungisama!

<sup>79</sup> Mpe kaka na ntangu yina profete vutukaka mpe tubaka, “Beno tala, Mwana-dimeme ya Nzambi yina ke katulaka disumu ya yinza!” Ntangu yayi yinki kele kubenda? Ya me soba na profete na profesu ya yandi.

<sup>80</sup> Ntangu yayi beno tala yina ke salama. Awa kwisaka Muntu mutindu bantu nionso, yina me zabana na muntu mosi ve, mwana ya kisadi-mabaya, ke na kwisa na kutambulaka na masa.

Ntangu Jean, profete ya nene, tubaka, “Mu ke na nsatu ya kubotama na Nge. Samu na yinki Nge me kwiza na munu?”

<sup>81</sup> Yandi tubaka, “Bika ti ya vwanda mutindu yina. Kasi, mutindu profete mpe Ndinga, ya ke lomba beto na kulungisa ludedomo nyonso.”

<sup>82</sup> Na yawu yandi bakulaka ti ba fwana sukula Munkayulu na ntuala ba ke talisa yawu, mpe yandi botikaka Yandi.

<sup>83</sup> Ntangu yayi ya kele na kubenda yankaka yina salamaka ntangu Yandi basikaka na masa. Profete yayi yina vwandaka ya kukwikama mingi tubaka yina vwandaka nsungi ya yandi mpe ntangu, yandi talaka na zulu mpe yandi monaka mazulu me zibuka. Yandi monaka Mpeve ya Nzambi, mutindu yembe, ke kulumuka na zulu ya Yandi, mpe Ndinga mosi tubaka, “Yayi kele Mwana ya Munu ya luzolo na kati ya Yandi Mu me sepela mingi.” Nzambi vwandaka siamisa nsangu ya profete, yina vwandaka benda bukebi na Jourdain.

<sup>84</sup> Mpangi mosi ya bakala yimbaka ntama mingi ve, to yandi zolaka yimba, “Na zulu ya myongo ntama mingi ve vwandaka na kulunsi mosi ya ntama ya ngolo.” Yinki kele kubenda na zulu ya Mongo Calvaire? Ntangu beto ke mona yinza ya misambidi me fundisa Yandi, mpe luyalu ya Rome me pesa Yandi kitumbu ya lufwa. Mpe awa ba komaka Yandi na kati-kati ya bimpumbulu zole, na mpwila ya masa, Menga vwandaka basika na nzutu ya Yandi. Kuna ba komaka Yandi, vwandaka boka, “Nzambi ya Munu, Nzambi ya Munu, samu na yinki Nge me bika Munu?” Mpe misambidi vwandaka ya kutelama kuna, vwandaka tala yawu, bawu zabaka ti profesu ya Ngwisani ya Ntama me salama kaka kuna na Calvaire na ntangu yina.

<sup>85</sup> David yandi mosi sonikaka, salaka . . . Mpeve kubwaka na zulu ya yandi mutindu baprofete nyonso, yandi salaka mutindu ti ya vwandaka yandi. David bokaka, na Psaumes 22, “Nzambi ya Munu, Nzambi ya Munu, samu na yinki Nge me bika Munu? Mikwa ya Munu nionso ke tala Munu. Ba me tobola maboko ya Munu mpe makulu ya Munu.” David, na kuzonzaka mutindu ya vwandaka yandi. Mpe ya vwandaka ve David, ya vwandaka Klisto na kati ya David.

<sup>86</sup> Mpe awa profesu yina ba samunaka, na baprofete ya kuswaswana, vwandaka lungisama na zulu ya Mongo Calvaire. Yinki kele kubenda na zulu ya Mongo Calvaire? Nzambi ke na kulungisa Ndinga ya Yandi.

<sup>87</sup> Kubenda yankaka vwandaka na zulu ya mongo, vwandaka na Kilumbu ya Pentecote, ntangu bawu nionso vwandaka kuna na feti ya misambidi, bawu banzaka ti bawu manisaka na bafanatiki nionso. Bawu kuwaka bawu ve kubanda bilumbu kumi. Na mbala mosi, mutindu nyosi, ba basikaka kuna na zulu ya kivinga, basikaka kuna na babala-bala, ke boka mpe ke sala mambu ya kukondwa mayele.



88 “Yinki yayi kele? Yinki zola kutuba yayi? Bantu nyonso yayi kele ya kulawuka malafu?”

89 Beno tala mbote! Mpe profete mosi telamaka na kati-kati ya bawu, mutindu ntumunu ya profete zolaka vwanda, mpe tubaka, “Beno bantu ya Israel, mpe beno yina ke zingaka na Judée, na Jérusalem, ti yayi kuzabana na beno, mpe beno kuwa bandinga ya munu. Bayayi kele ve ya kulawuka malafu mutindu beno ke banza yawu. Kasi yayi kele yina Mfumu zonzaka na nzila ya Joël, profete, ‘Ya ke salama ti na bilumbu ya nsuka, Mu ke mwangisa Mpeve ya Munu na zulu ya bantu nionso.’” Yina vwandaka kubenda ya nene.

90 Bantu ya nsambululu, na manima ba me koma Ntinu ya Luzingu, mpe nionso yina, kasi bawu monaka ve nsilulu ya nkwezulu ya Mpeve-Santu. Kubenda, “Nani kele yayi? Yinki zola kutuba yayi? Yinki kele diambu na bantu yina?”

91 Oh, la la! Ya kele mutindu mosi bubu yayi. Beto ke bika bima mingi yayi samu na kukuma na ngunga yayi. Kima mutindu mosi kele bubu yayi. Kima ya mutindu mosi ke na kusalamaka. Kyuvu mutindu mosi ba me yufula. “Samu na yinki makelele nyonso yina?” Beno tala kuna na bala-bala, matoma ke katuka na Michigan tii na Floride, katuka na Maine tii na Californie. Na suka yayi ntangu mu basikaka na ditoma, to kaka na manima ya midi, beto vwandaka tambula na bala-bala, kento ya munu mpe munu vwandaka tala ba-plaque ya immatriculation ya matoma. Ya kele kisika mu banzaka na dilongi yayi.

“Yinki yayi zola kutuba?”

92 Kaka mutindu Yawu tubaka, “Kisika Mvumbi kele, kuna bangononi ke vukana.”

93 Mu tubaka na kento ya munu, “Cherie, nge ke bambuka moyo na nkokila ya nsuka ntangu mu zolaka pesa bayo na muntu nionso ya luzolo samu na munu na zulu ya ntoto, mpe mu zolaka kwenda na bilanga samu na kubanda kima yina Nzambi tubaka na kusala? Nge yimbaka nkunga yina.”

Oh, bawu ke katuka na Esete mpe na Wesete,  
 Bawu ke tukaka na bayinsi ya ntama,  
 Samu na kusala feti na Ntinu ya beto, samu na  
 kudya mutindu banzenza ya Yandi;  
 Mutindu kele ya kusakumuna bizyeti yayi!  
 Na kutalaka kizizi ya Yandi ya santu  
 Kulezima na zola ya Kinzambi;  
 Bayina ke vwanda ya kusakumuna na lemvo ya  
 Yandi,  
 Mutindu misanga na yimpu ya Yandi ke lezima.

94 Yawu yina kubenda kele. Nkuna ya Nzambi yina ba soolaka na ntuala yina lendaka ve kusala kima yankaka kasi kulanda Yawu, zola kutuba mingi kulutula luzingu samu na beto. Beno baka baluzingu ya beto, kasi beno baka Yawu ve. Yinki kele

kubenda? Nzambi, mutindu na mumesanu, ke na kulungisa Ndinga ya Yandi. Yandi ke na kulungisa diaka Ndinga ya Zacharie, ya profete Zacharie.

<sup>95</sup> Kisika mu tangaka nzila ya 9 ntama mingi ve, ntangu Yesu kotaka na tempelo ya Yandi, na zulu ya mpunda. . . to kotaka na Jérusalem, na zulu ya mwa mpunda, ya mpembe, profesi lungisamaka yina Zacharie tubaka. Yawu yayi, “Beno sepela mingi, O bana-bakento ya Sion. Beno boka, O bana-bakento ya Jérusalem. Tala, Ntinu ya nge ke na kwiza na nge; Yandi kele ya ludedomo, mpe kele na mpulusu; na lembami, na zulu ya mpunda ya kento, mpe na zulu ya mwana ya mpunda ya kento.” Ya kele samu na yina kubenda vwandaka na Jérusalem, na quartier général ya misambidi.

<sup>96</sup> Ntangu yayi beto ke mona kima ya kilumbu ya nsuka kusalama! Beto zibula kaka mwa ba-page, na Zacharie, mpe beto tala yina yandi tubaka samu na yawu. Beto baka yawu kuna samu na bilumbu ya nsuka. Yina vwandaka nsungi ya kati-kati; beto baluka ntangu yayi na bilumbu ya nsuka. Mpe beno baka Zacharie, kapu ya 14, mpe kubanda na nzila ya 4. Mpe beno kuwa! Mpe beto ke tanga kitini ya Masonuku, na kutala banzila yivwa, kubanda 4 tii na 9. Beno kuwa mbote. Mpe ya ke na kupesa profesi ya Nkwizulu ya Yandi, bilumbu ya nsuka. Beno kuwa mbote ntangu yayi. Yayi kele MUTINDU ME TUBA MFUMU. Ya kele Masonuku, Zacharie 14. Beno bambuka moyo na Zacharie 9, yina Yawu tubaka? Mpe bawu zabaka Yawu ve. Ntangu yayi yinki ya kele bubu yayi? Zacharie 14, na kuzonzaka na Nkwizulu ya Yandi.

*Mpe makulu ya yandi ke telama na kilumbu yina na zulu ya mongo ya ba-Olivier, dyaka, yina kele na ntwala ya Jerusalem na esete, na zulu ya mongo ya Olive ke pasuka na kati-kati na ntwala ya esete mpe na ntwala ya wesete, mpe ya ke vwanda na kiwanda mosi ya nene; . . . ndambu ya mongo ke kwenda na node, mpe ndambu . . . na sude.*

*Mpe beno ke kima na kiwanda ya myongo ya munu; samu kiwanda ya myongo ke simba na Atsal: yinga, beno ke kima, mutindu beno kimaka na bilumbu ya kuningana ya ntoto na bilumbu ya Ozias ntinu ya Juda: . . .*

<sup>97</sup> Kuningana ya ntoto yankaka ke zibula ntoto! Kana beno zola kulanda Masonuku awa, beno tala na nzila ya 5 yayi, ya ke vwanda ti kuningana ya ntoto ke panza Mongo ya ba-Olivier, mpe yayi me siamisama na Esaïe 29:6 mpe Apocalypse 16:9. Kieleka! Yinki ya kele? Profete mosi tubaka samu na nkwizulu ya Yandi ya ntete, monaka Nkwizulu ya Yandi ya zole. Beno tala, “Mutindu na bilumbu ya kuningana ya ntoto.” Beno me mona yina kuningana ya ntoto ke na kusala? Beno me mona bansamunu ya yawu?

*. . . mpe MFUMU Nzambi ya beno ke kwiza, mpe basantu ya yandi nyonso na nge.*

*Mpe ya ke salama na kilumbu yina, (alleluia) na kilumbu yina, ti nsemo ke vwanda nsemo ve, to mpimpa:*

*Kasi ya ke vwanda kilumbu mosi na . . . kilumbu mosi yina ke zabana na MFUMU, kilumbu ve, to mpimpa ve: kasi ya ke salama, ti na ntangu ya nkokila nsemo ke vwanda.*

98 O Nzambi!

Ya ke vwanda na Nsemo na ntangu ya nkokila,  
Profete ya mutindu mosi, mpe bantu kele ya kufwa meso!  
Yinki kele kubenda? Beto tanga mwa banzila dyaka.

*Mpe ya ke vwanda na kilumbu yina, ti bamaza ya moyo ke basika na Jérusalem; ndambu ya yawu na ntwala ya mubu ya ntama, mpe ndambu . . . na ntwala ya mubu ya kulala ya mwini: na été mpe . . . hiver ya ke vwanda. (Nsangu ya mbote ke na kukwenda na ntwala; ba-Juif mpe Bantu ya makanda.)*

*Mpe MFUMU ke vwanda ntinu na zulu kuna . . . ntoto: na kilumbu yina, mpe ya ke vwanda na MFUMU mosi, mpe nkumbu ya yandi ke vwanda mosi.*

Ya ke vwanda na Nsemo na ntangu ya nkokila,  
(Kieleka!)

Beno ke mona kieleka nzila ya Nkembo;  
Na nzila ya maza, kele Nsemo bubu yayi,  
Luzikulu na Nkumbu ya ntalu ya Yesu.  
Ntwenya mpe kuluntu, beno funguna masumu  
ya beno nyonso,  
Mpeve-Santu kieleka ke kota;  
Nsemo ya mpimpa me kwiza,  
Ya kele dyambu ya kieleka ti Nzambi mpe  
Klisto kele Mosi.

Beno me mona kisika beto kele?

Bayinsi ke na kukabwana, Israel ke na kuvumbuka,  
Bidimbu yina bapofete ya beto zabisaka na ntwala; (Kuningana ya ntoto na Bantu ya makanda, na kilumbu ya nsuka.)  
Bilumbu ya Bantu ya makanda me tangama,  
bawu me fuluka na kyadi;  
“Vutuka, O nge yina me zimbana, na yina ya nge.”

99 Beno yina ba me basisa na ngaanda, mpe banzaza yayi ba ke na kunata na bapusu ya malu-malu, beno basika kuna na ntwala lufwa kubula beno. Nzambi me siamisa Yawu. Ya ke vwanda mutindu yina.

100 Beto baka Disonuku yankaka na Ngwisani ya Ntama, Malachie kapu ya 4, mpe beno tanga mwa kapu yina ya 4.

*. . . beno tala, kilumbu ke na kwiza, yina ke kuzika mutindu dibulu ya tiya; mpe bantu nyonso ya lunangu, yinga, . . . bayina nyonso ke salaka yimbi, ke vwanda mutindu matiti: . . .*

101 Ntangu yayi, yayi kele ve. . . Ya kele Malachie 3, vwandaka nkwezulu ya ntete, ntangu yayi awa kele nkwezulu yina ke landa. ata mpe Docteur Scofield awa, ya kieleka mu ke wisana na yandi ve na banoti ya yandi ya nsi, kasi yandi me sungika yawu mbote awa. “Lutumumu ya Jean,” na Malachie 3; mpe, “Nkwezulu ya zole ya Klisto,” mpe Elie yina ke kwisa na ntuala ya yawu. Mbote mingi.

*. . . bantu nyonso ya lunangu ke yokama, me tuba MFUMU ya makesa, mpe ya ke bika bawu ata musisa to divala. (Wapi kele difelo ya “Kukonda nsuka” ntangu yayi?)*

*Kasi samu na beno yina ke zitisaka nkumbu ya munu Mwini ya ludedomo ke telama na ba-campagne ya kubeluka ya nzutu, na kubeluka na mapapu ya yandi; . . . beno ke basika, mpe beno ke lemuka; mutindu bana ya ngombe ya kidikilu.*

*Mpe beno ke diata bantu ya yimbi; . . . ba ke vwanda mutindu fundu-fundu na nsi ya makulu ya beno na kilumbu yina mu ke sala yayi, me tuba MFUMU ya makesa.*

*Beno bambuka moyo. . . musiku ya Moise kisadi ya munu, yina mu tumaka. . . yandi na Horeb samu na Israel nionso, . . . misiku mpe lusambusu.*

102 Awa kele nkwezulu ya Elie.

*Beno tala, mu ke tinda beno Elie profete . . .*

103 Masonuku ya nsuka ya Ngwisani ya Ntama!

*. . . Mu ke tinda na beno Élie profete na ntuala ya nkwezulu ya kilumbu yina ya nene mpe ya boma ya MFUMU:*

104 Ntangu yayi, yina zolaka vwanda ve Jean. Ve. Beno me mona, yinza vwandaka yokama ve na tiya mpe bantu ya kudedama tambulaka ve na zulu ya bantu ya yimbi. Beno me mona? Ve, ve.

*. . . na ntuala ya kilumbu ya nene mpe ya boma ya MFUMU:*

*Mpe yandi ke vutula bantima ya batata na bana, mpe bantima ya bana na batata, na boma ti mu kwiza mpe kusemba ntoto na nsingulu.*

105 Beno tala kulunga ya Mpeve-Santu, ti Yandi zolaka ve bankwezulu zole ya Elie kupitakana. Malachie 3, tubaka, “Tala,

Mu ke tinda munati-nsangu ya Munu na ntwala ya kizizi ya Munu.” Ba yufulaka Yesu samu na Jean; Yandi tubaka, “Kana beno lenda ndima yawu, yayi kele yina profete tubaka, ‘Mu ke tinda munati nsangu ya Munu na ntwala ya kizizi ya Munu.’ Yayi kele Elie yina zolaka kwiza.” Malachie 3.

<sup>106</sup> Beno tala wapi mutindu Masonuku ke talisa yawu na mutindu ya kulunga. Beno tala mbote yina yayi. . . samu na kulakisa. . . bayina zola kukwikila, bayina zola kumona. Beno bambuka moyo, Yesu telemaka na kati-kati ya Masonuku, samu ti kitini ya yawu lungisamaka kuna, yina yankaka samu na Nkwizulu ya Yandi ya zole? “Samu na kulonga mvula ya lemvo ya Mfumu, samu na kulembika bantima ya kulwala,” mpe telemaka; ve “samu na kunata lufundusu na Bantu ya makanda” tii na Nkwizulu ya Yandi ya zole.

<sup>107</sup> Beno tala Masonuku yayi awa me fwanana na yawu. “Mpe yandi, Elie, ke vutula bantima ya batata na bana.” (Ntangu yayi na kuzonzaka samu na Malachie 4, beno vukisa yawu ve, to Malachie 3.) Jean, Elie, yina kwizaka na bilumbu na ntwala ya nkwizulu ya ntete ya Klisto, vutulaka bantima ya batata ya nkooko ya ntama na nsangu ya bana, nsangu ya malu-malu.

<sup>108</sup> Ntangu yayi beno tala mbote. “Mpe bantima ya bana na batata.” Na nkwizulu ya yandi ya zole, na bilumbu ya nsuka, yandi ke vutula diaka na Lukwikilu ya bantumwa. Beno me mona mutindu ya kulunga Masonuku ke sungama?

<sup>109</sup> Yina vwandaka nsuka ya Ngwisani ya Ntama, Ngwisani ya Ntama. Ntangu yayi beto ke mona ti ya kele na Nsemo na ntangu ya nkokila. Yinki Yawu kele? Ya kele nsongi, Nsongi ya nsongi ya Yinti.

<sup>110</sup> Mutindu mu tubaka na suka yayi, beto me luta na ba-denomination, na (yinti ya malala ve) mutindu mu zonzilaka na suka yayi, kasi beto me kuzwa ba-pamplemousse, malala ya ngayi, mitindu nyonso ya bima yankaka yina vwandaka ata fioti ve mutindu na mbandukulu. Kasi na manima. . . Beno kondwa Yawu ve. Yawu yayi me kwiza. Na manima ba-denomination nionso me sala ntangu ya bawu, bawu vwandaka ve na Nsemo mosi na kubanda, ya ke vwanda na kilumbu yina ba lenda bokila ve kilumbu to mpimpa.

<sup>111</sup> Yinki ba ke na kusalaka? Yinki ba ke na kusala? Yinki citron ke sala na yinti ya malala? Ya ke kunwa luzingu ya kisina ya dilala yina ke mata na yinti mpe ke bebisa yawu na nzila ya dilala. Yawu yina ba-denomination salaka na Ndinga ya Nzambi, salaka ti Ndinga ya Nzambi kusala kisalu ve na nzila ya binkulu ya bawu. Ya kele MUTINDU ME TUBA MPEVE YA MFUMU. Ba me buta malala ya ngayi, ba-pamplemousse, malala ve.

<sup>112</sup> Kasi yinki profete tubaka? Yandi yina mosi tubaka na dilongi ya beto na nkokila yayi, “Beno sepela, O bana ya bakento ya

Jérusalem, beno boka ngolo, bana ya bakento ya Sion, samu ti Ntinu ya beno ke na kwiza na beno, ya lembami mpe ya kukikulumususa, ya kuvwanda na zulu ya mbulukuku ya kento,” beno tala profete yina mosi tubaka, “Ya ke kwiza ntangu ya kuyelisa mbuta.” Ba ke fidisaka mwini na zulu ya ntoto samu na kuyelisa mbuma. Samu na yinki ya lendaka ve kuyelisa? Ya kele ve na mbuma kuna samu na kuyelisa. Kasi Luzingu ke na kulandila na kukwenda na ntwala.

113 Yandi mataka na kati ya pamplemousse, samu na kubuta dilala, beto me mona ti yawu kumaka organisation; ya vwandaka pamplemousse. Ya me basika diaka, yina me basika ntangu yina vwandaka citron. Ya me landila diaka, ya me basisa kima yankaka. Mpe na nsuka, na nsongi ya yinti, ya me basisa tangelo, yina kele ndambu dilala, ndambu dilala ya ngayi; kima yina ba me vukisa, kima yina ba me bebisa; ya me kuma kubeba, yina ke benda luzingu na yinti yina mosi; mpusu, “lendaka kuvuna Basolami.” Ya ke talana mutindu dilala, kasi ya kele ve.

114 “Kasi ya ke vwanda Nsemo,” ntangu yandi ke kula na zulu ya organisation. Ntangu ya ke kwenda na zulu ya organisation, ya ke zibuka dyaka, yandi ke basisa malala mutindu yandi vwandaka ntangu yandi kotaka na ntoto, mpe kuna ya ke vwanda na Nsemo.

115 Yinki kele kubenda yayi; yinki yayi ke na kusalama? Ya ke na kulungisa Ndinga ya Nzambi. Ya kele na bambangi zole ya Ngwisani ya Ntama, ti yayi ke salama.

116 Beto baka Jean 14:12, ya Ngwisani ya Malu-malu, Yesu tubaka.

*. . . Yandi yina ke kwikila na Munu, bisalu yina Mu ke sala yandi mpe ke sala yawu; . . .*

117 Mpe, na Luc 17:2 tii na 30, Yandi tubaka.

*Mutindu ya vwandaka na bilumbu ya Lot, na ntwala ya Sodome, yokamaka na tiya, mutindu mosi ya ke vwanda na kuvutuka ya Mwana ya muntu, ti kilumbu yina ntangu Mwana ya muntu ke monisama.*

118 Oh, beno tala kaka na Masonuku! “Mwana ya muntu,” Yesu Klisto mutindu mosi mazono, bubu yayi, mpe kukonda nsuka, kulaka na zulu ya ba-dénomination, kulaka na zulu ya Yinti. Yinki Yandi tubaka na Jean 14, to 15? “Konso divala yina kele na kati ya Munu, yina ke butaka ve mbuma, ba ke katula yawu mpe ke zenga yawu, ke losa yawu na tiya mpe ke yoka yawu na tiya. Kasi konso divala yina ke butaka mbuma, ya ke vwanda ya kuvedila.”

119 Oh, ya ke vwanda na mvula ya ntete mpe ya nsuka na bilumbu ya nsuka na zulu ya mwa kimvuka yina kwisaka na Yandi na zulu ya mwa mpunda yayi, ya lembami mpe ya kukikulumususa, ve ku-. . .to dénomination, na kubokaka,

“Hosanna na Ntinu yina ke kwiza na Nkumbu ya Mfumu!” Yinki kele diambu bubu yayi? Yinki kele kubenda na zulu ya mongo?

<sup>120</sup> Ntama mingi ve, mu vwandaka ya kutelama na chaire yayi, ba tubaka na Mpeve-Santu, “Kilumbu ke kwiza yina ntangu ba ke kuna yinti na ntwala ya yinzo ya nge; ba ke katula mwelo ya nge. Na yawu, ti, samu na kukeba nge na yawu, samu ti nge dasuka ve.” Mu monaka ba me katula mwelo ya munu mpe ba me tula yawu na lweka ya mongo. Mu monaka mongo na ntwala ya munu, ba me timuna, ya vwandaka na mabaya mpe bima ti kima mosi bebisaka yawu. Yandi tubaka . . .

Mu talaka, mpe ya vwandaka na Ricky mosi yina telamaka kuna mpe losaka mwelo yina, salaka yayi. Mu tubaka, “Samu na yinki nge me tuba na munu ve?” Yandi vwandaka na luzitu ve na ntwala ya munu, mpe mu zolaka bula yandi. Mpe ntangu ya salaka mutindu yina, mu tubaka, “Mu me salaka yayi ve kubanda mu vwandaka na kisika ya kunwana, kasi mu zola kaka ti nge zaba,” mpe mu bulaka yandi mbata. Mpe ntangu mu bwisaka yandi na ntoto, mu telemisaka yandi diaka mpe losaka yandi diaka na ntoto. Mu lokotaka yandi, bambala tatu to yiya, na manima mu losaka yandi na zulu ya mongo. Na yawu na manima mu kwendaka kuna, mpe mu tubaka, “Ya me lunga ve.” Mpe mu lokotaka yandi mpe mu pesaka yandi mbote, mu tubaka, “Mu kele ya kudasuka ve na nge, kasi mu zola kaka nge zaba ti nge lenda ve kutuba na munu mutindu yina.”

Mpe na manima ntangu mu balukaka mpe vutukaka, Mpeve-Santu vwandaka ya kutelama kuna na mwelo, tubaka, “Na yina kwenda ntama na yayi. Ntangu ba ke tula yayi, kwenda na wesete.”

Buku yayi, nyonso yina mu kele na yawu nsatu,  
 Buku yayi kele Mvutu ya mbote,  
 Nzila yina ke lakisaka mutindu mu lendaka  
 kuluta na lweka ya bampasi ya munu. Amen!

<sup>121</sup> Mpe Buku yina kele Ndinga, mpe Ndinga yina kele Nzambi. Samu na kuluta na lweka ya bampasi ya beno, Yawu ke tuba na beno yinki kusala.

<sup>122</sup> Bamvula tatu me luta mu kuwaka nkundi ya munu, arpenteur ya mbanza, yandi ke zingaka na nsi mingi na bala-bala ya munu, yandi vwandaka kotisa jalon. Mu kwendaka kuna mpe tubaka, “Yinki kele diambu, Mud?” Mwana-bakala ya tata King, nkundi ya munu mosi.

Yandi tubaka, “Billy, ba ke kumisa nene nzila yayi.”

<sup>123</sup> Beno nyonso ke bambuka moyo. Mu tubaka, “Ya lendaka vwanda kiamvu.” Mu tubaka na Mpangi Wood, mu tubaka, “Bumba kima ya nge. Mu banza ti kiamvu yina ke luta awa, kima mosi.” Ba panzaka nzila; babiliki, matadi, vwandaka ya kulosa bisika nyonso. Na yawu yandi tubaka . . . Mu tubaka, “Bumba kima ya nge.” Na yina ntangu mu . . .

Tata King tubaka na munu ti yina ke salama.

<sup>124</sup> Mu kotaka, mu tubaka na kento ya munu yina me vwanda kuna, “Cherie, kima mosi me sonama samu na yawu. Ya kele MUTINDU ME TUBA MFUMU, kisika mosi kuna.”

<sup>125</sup> Mu kotaka mpe bakaka buku ya munu, mu talaka na kati ya yawu, mpe ya tubaka, “Ya ke salama . . .” Bamvula nana na ntwala!

<sup>126</sup> Na yina ntangu mu talaka yawu, mu tubaka, “Ya kele ntangu ntangu yayi, cherie, beto fwana kwenda na wesete.”

<sup>127</sup> Bilumbu zole na manima ya yina, mu vwandaka ya kutelama na kivinga pene ya ngunga kumi na suka mosi, mu kotaka na Mpeve ya Nzambi. Mu monaka mwa kimvuka ya bayembe yina vwandaka pumbuka, mu talaka mwa bandeke yina ya fioti. Beno ke bambuka moyo na yawu. Mu monaka Bawanzio sambwadi na mutindu ya pyramide, ke kwiza na mbangu mingi na ntwala ya munu. Yandi tubaka, “Kwenda na wesete, kwenda na Tucson, nge ke vwanda na bakilometele makumi sambanu na tanu na node esete. Mpe nge ke katula kinama,” to dinsendele, ba ke bokilaka yawu kuna, “na zulu ya bilele ya nge.”

<sup>128</sup> Mpangi Fred Sothmann, yina kele ya kuvwanda kuna ke tala munu na ntangu yayi, vwandaka kuna na suka yina. Mu zimbanaka yawu.

<sup>129</sup> Mu tubaka, “Ya vwandaka na kupasuka yina salamaka mutindu kuningana ya ntoto, yina ningisaka kaka bima nionso vwandaka na yinsi. Mu ke mona ve wapi mutindu muntu lendaka zinga na yawu.” Mu vwandaka na boma. Mu telamaka na Phoenix, beno nyonso yina ke na kuwa na nkokila yayi kuwaka kimbangi ya munu. Mu longaka na zulu ya dilongi, *Batata, Wapi Ntangu Ya Kele?* “Wapi kisika beto kele?” Mu kwendaka na wesete. Mingi ya beno awa kele na bande yina, mingi ya beno awa kuwaka yawu kutuba, mvula to kulutila ntete ya salama.

<sup>130</sup> Mu kwendaka na wesete, mu vwandaka kukiyufula yina zolaka salama. Kilumbu mosi mu kuzwaka mbokolo na Mfumu. Mu tubaka na kento ya munu, mu tubaka, “Cherie, mu kele . . . mu banza ti kisalulu ya munu me suka.” Mu zabaka ve. Mu tubaka, “Mu . . . Nzambi, kukondwa ntembe Nzambi me manisa na munu ntangu yayi mpe mu ke kwenda na Yinzo. Kwenda kutana na Billy, nata bana. Nzambi ke sala nzila samu na beno, na mutindu nionso. Landila mpe zinga kieleka na Nzambi. Landila mbote ti bana manisa lukolo ya bawu, sansa bawu na kulongaka bawu landila malongi ya Nzambi.”

Yandi tubaka, “Bill, nge zaba ve—nge zaba ve ti ya kele kieleka.”

Mu tubaka, “Ve. Kasi muntu lendaka zinga na yawu ve.”



<sup>131</sup> Na suka mosi Mfumu vumbulaka munu, tubaka, “Mata kuna na Canyon Sabino.” Mu bakaka kitini ya papié mpe Biblia ya munu.

Kento ya munu tubaka, “Wapi kisika nge ke kwenda?”

Mu tubaka, “Mu zaba ve. Mu ke tuba na nge ntangu mu ke vutuka.”

<sup>132</sup> Mu kwendaka kuna na canyon, mu mataka kuna na zulu kisika bangononi vwandaka pumbuka. Mu vwandaka tala mwa mbambi ya kutelama kuna. Mu fukamaka samu na kusambila, mpe telemisaka maboko ya munu, mpe Mbele ya meno na balweka zole kwisaka na diboko ya munu. Mu talaka na nziunga. Mu banzaka, “Yinki yina? Mu kele ve na kati ya munu mosi. Awa kwisaka Mbele yina na diboko ya munu; yina vwandaka ngenga, vwandaka sema, vwandaka lezima na mwini.” Mu tubaka, “Ntangu yayi, ya kele ve na bantu na bakilometele ntama na munu, kuna na canyon yayi. Wapi kisika ya lendaka katuka?”

Mu kuwaka Ndinga mosi, tubaka, “Yina kele Mbele ya Ntinu.”

Mu tubaka, “Ntinu ke salaka bakala mosi munati mpunda na mbele.”

<sup>133</sup> Yandi, Ndinga, me vutuka, me tuba, “Mbele ya ntinu mosi ve, kasi, ‘Mbele ya Ntinu,’ Ndinga ya Mfumu.” Yandi tubaka, “Vwanda na boma ve. Ya kele kaka Kubenda ya Tatu. Ya kele nsiamisa ya ministere ya nge.”

<sup>134</sup> Mu vwanda zomba na nkundi mosi, na kuzabaka ve yina zolaka salama.

Mpe muntu mosi bokilaka munu, yandi yina vwezaka munu samu na foto yina ya Wanzio ya Mfumu, yandi yina bakaka yawu. Mu zolaka kwenda na Houston samu na mwana ya yandi ya bakala, samu yandi vwandaka kwenda na kizunga ya bantu ya kufwa mpe ba zolaka kufwa yandi na mwa bilumbu fioti. Mpe yandi kutanaka na munu kuna mpe yandi yambaka munu, yandi tubaka, “Kubanza, muntu ya kieleka yina mu me sawula me kwisa vulusa mwana ya munu mosi kaka!” Kimvuka ya bantu pesaka munu yina ba ke bokilaka oscar, to nyonso yina beno zola kubokila yawu, samu na kuvulusa luzingu.

<sup>135</sup> Na manima beto vutukaka, mu kwendaka na zulu ya mongo samu na kuzomba. Kuna, Mpangi Fred mpe munu, na suka mosi ntangu mu basikaka, mpe mu—mu kuzwaka ntete pécaru ya munu, mpe mu talaka mpe mu monaka kisika yina ba vwandaka kwenda. Mu tubaka, “Mpangi Fred, kwenda na zulu ya mongo yina na suka-suka ntangu yayi, pene ya mbandukulu ya kilumbu, mpe mu ke kwenda na yina yankaka. Mu ke kufwa ve ngulu ya mfinda, mu ke kufwa yandi ve. Kasi kana ba me

kwisa na lweka yayi, kimvuka yayi, mu ke bula munduki na ntwala ya bawu samu bawu kutina.”

<sup>136</sup> Mpangi Fred kwendaka kuna mpe ya vwandaka ve na bangulu ya mfinda. Yandi ningisaka diboko na ntwala ya munu mpe mu monaka. Mu kulumukaka kuna na canyon, na mabulu ya nene, mwini vwandaka basika kaka. Mu kwizaka pene-pene ya lweka yankaka ya mongo, mu vwanda banza ve kima mosi samu na yina me tala baprofesi. Mu vwandaka kuna, ke vingila, ke pema; mu banzaka, “Yinki me salama na bangulu yina?”

<sup>137</sup> Mu lokotaka ya munu... Mu vwandaka ya kuvwanda mutindu ba-Indien ke salaka, beno zaba, na makulu ya kupitakana. Mu talaka na dikulu ya munu ya kibakala, mpe ya vwandaka na dinsendele mosi. Mu katulaka yawu. Mpe mu tubaka, “Ya kele ngitukulu! Munu yandi yayi, pene ya ba-kilometre makumi sambanu na tanu ya Tucson. Ya kele mwana ya munu ya bakala Joseph ya kuvwanda kuna ke na kuvingilaka munu.” Mpe na yina mu bandaka na kutala, mu monaka kimvuka ya bangulu ya mfinda me basika pene ya ba-kilometre nkama yivwa na kumi na yiya na munu, kuna na zulu ya mongo, mu losaka disendele na ntoto. Mu tubaka, “Mu ke kuzwa yawu. Mu ke kwenda baka Mpangi Fred, mpe mu ke namika kitini ya papié samu na kuzaba wapi nzila ya kukwenda, na zulu ya ocotillo yayi awa, mpe beto ke kwenda baka Mpangi Fred.”

<sup>138</sup> Mpe mu bandaka na kumata mongo, na mbangu nionso mutindu mu lendaka sala na simu yina yankaka. Na mbala mosi, mu banzaka ti muntu mosi bulaka munu munduki. Mu me kuwaka ata fioti ve makelele ya mutindu yina; ya ningisaka yinsi ya muvimba. Mpe, ntangu ya salaka mutindu yina, na ntwala ya munu vwandaka kimvuka ya Bawanzio sambwadi.

<sup>139</sup> Mu kutanaka na Mpangi Fred mpe bayankaka, na mwa manima. Yandi tubaka, “Yinki ya vwandaka?”

Mu tubaka, “Ya vwandaka yawu.”

“Yinki nge ke sala?”

<sup>140</sup> “Vutuka na yinzo. Samu, MUTINDU ME TUBA MFUMU, mansweki sambwadi yina me bumbama na kati ya Biblia bamvula nyonso yayi, ba-denomination yayi mpe nyonso, Nzambi ke zibula mansweki sambwadi yina na beto na kati ya Bidimbu Sambwadi.”

<sup>141</sup> Ya vwandaka na selekele yina katukaka na ntoto, mutindu lubungi yina vwandaka salama. Ntangu Yawu salaka, Yawu kwendaka mbala mosi na mongo, bandaka na kusala selekele na wesete, kisika Yawu katukaka. Science monaka Yawu na manima ya mwa ntangu fioti, ya vwandaka na bakilometre makumi yiya na nana na zulu mpe bakilometre makumi yiya na bunene, selekele yango vwandaka kaka mutindu pyramide.

142 Mpe kilumbu yina, mu vwandaka ya kutelama kuna, mu balulaka foto na diboko ya kibakala, mpe ya vwandaka Yesu mutindu Yandi vwandaka na Bansungi Sambwadi ya Dibundu, na perruque ya mpembe, na kulakisaka Bunene ya Bunzambi. Yandi kele Alpha mpe Omega; Yandi kele ya Ntete mpe ya Nsuka; Yandi kele Zuzi ya Nene ya Seko nyonso, ya kutelama kuna samu na kusiamisa Nsangu ya ngunga yayi. Mpe ya ke vwanda na Nsemo na ntangu ya nkokila! Yinki ya kele? Yinki ya vwandaka?

143 Mu kwendaka na wesete. Na zulu ya mongo yina mosi, mu vwandaka luta kuna na Banks Wood, Yandi tubaka, "Losa ditadi. Tuba na Tata Wood, 'MUTINDU ME TUBA MFUMU, nge ke mona Nkembo ya Nzambi.'"

144 Kilumbu yina landaka, mu vwandaka ya kutelama kuna, kitembo mosi kulumukaka mpe ningisaka myongo. Matadi zengaka bansongi ya bayinti, pene ya ba-centimetre makumi yivwa to nkama mosi na makumi zole na zulu ya yintu ya munu. Ya vwandaka na bakupasuka tatu ya nene, mpe bampangi ya babakala kwisaka mbangu na munu. Ya vwandaka na bantu pene ya kumi na tanu ya kutelama kuna, milongi mpe nyonso yankaka. "Yinki ya vwandaka?" Yandi tubaka, "Yinki ya vwandaka?"

Mu tubaka, "Lusambusu ke na kubula na Côte Ouest."

145 Pene ya bilumbu zole na manima ya yina, kuningana ya ntoto na kutala dindisaka Alaska. Yinki kele Nsemo yayi na zulu ya Mongo Sunset na Coronado ya Arizona? Yinki kele kima yayi ya ngitukulu yina me salama kuna, ti bantu vwandaka kwisa na matoma na esete na wesete, samu na kulokota matadi yina kubwaka pene-pene ya kisika yina Yawu kubwaka? Mpe mosi na mosi ya yawu, konso ditadi, kele na bansongi tatu na zulu ya yawu, kisika Yawu katukaka. (Nionso tatu kele Mosi.) Ba me tula yawu na zulu ya ba-bilo, ba me tula yawu mutindu presse-papier, na yinsi ya muvimba. Yinki kima yayi ya ngitukulu na zulu ya Mongo Sunset na Mfinda ya Coronado?

146 Junior Jackson yina ke na kuwa, nge ke bambuka moyo na ndosi yina yandi kuzwaka yina mu me tendulaka, "na kukwendaka na kulala ya mwini"? Mpe yayi salamaka na zulu ya Mongo "Sunset." Ya kele ntangu ya nkokila, ntangu ya kulala ya mwini. Nsangu ya kulala ya mwini na nsuka ya masolo, na nsuka ya profesi, mu zola kutuba, me lungisama. Mpe ya ke vwanda na Nsemo na ntangu ya nkokila, na zulu ya Mongo Sunset na Mfinda ya Coronado, na bakilometele makumi sambanu na tanu na Tucson. Beno kwenda tala kalati kana yina kele Nsongi ya Sunset. Ya kele kieleka kisika yina ya me salama. Mu vwandaka zaba yawu ata fioti ve tii kilumbu yankaka yina.

147 Nyonso yina... Yina ke kufwa ata mbala mosi ve. Ya ke na kubaluka ntangu nyonso Yawu mosi. Kubanda na diambu yina salamaka, tii na foto ya Yesu ya kutelama ke na kutalaka

beto; mpe ntangu yayi kieleka na zulu ya Mongo Sunset, mpe Nsemo ya kulala ya mwini. Nsemo ya nkokila me kwiza, Nzambi ke na kukisiamisa Yandi mosi. Yinki ya kele? Ya kele makieleka ti Nzambi mpe Klisto kele mosi. “Mpembe,” bantu yikwa monaka yawu, perruque ya mpembe na zulu ya Yandi, mutindu beto vwandaka zonzila na Apocalypse 1? Beno me mona, Bunene ya Bunzambi, Kimfumu ya Nene; ndinga yankaka ve, nzambi yankaka ve, kima yankaka ve! “Na kati ya Yandi ke zinga movimba ya Bunzambi na nzutu.” Bawanzio Bawu mosi vwandaka perruque ya Yandi. Amen.

<sup>148</sup> Yinki salamaka na zulu ya Mongo Sunset? Nzambi vwandaka siamisa Ndinga ya Yandi. Yawu yina makelele nyonso yayi kele. Beno tala, ya kele Nzambi ke na kulungisa dyaka Ndinga ya Yandi ya nsilulu, ya Apocalypse 10:1 tii na 7, “Mpe na bilumbu ya muningu ya Nsangu ya wanzio ya sambwadi, dinsweki ya Nzambi ke suka.” Dinsweki ya kubumbama ya Apocalypse 10:1 tii na 7, Nsangu ya nsuka na nsungi ya dibuundu ya nsuka. Ke lungisa kieleka, na nsungi yayi, Santu Luc 17:30, “Kilumbu yina Mwana ya muntu ke monisama pwelele.”

<sup>149</sup> “Mpe kuna ke telama baprofete ya luvunu mpe Baklisto ya luvunu, ke lakisa bidimbu ya nene mpe mambu ya ngitukulu, na mutindu ti ya ke vuna Basolami kana ya lendaka salama.” Bantu kele kaka na ntembe. Mpe, mutindu na mumesanu, dibuundu kele kaka mutindu puzzle.

<sup>150</sup> Mpe science, bisika nyonso na Tucson dyaka, bawu ke sonika dyaka mikanda mpe ke tula na zulunale. Kubanda ntama kuna na zulu ya Mongo Lemmon, ba-camera yayi ya nene monaka Yawu ve kumata na kisika beto vwandaka ya kutelama; na kukwendaka na malembe na Wesete, na kulakisaka ti ntangu me suka. Ya lenda ve kukwenda na mwa kitezo ya fioti kuna; ya kele na Côte Ouest. Lufundusu me bula kaka na lweka yina ya me kwenda. Ya me mata mbala mosi kuna na Phoenix mpe me landila kuna, tii na Prescott mpe na myongo kuna na Côte Ouest, na kulandilaka na kumata tii na . . . Wapi kisika bawu vwandaka kwenda? Mbala mosi kuna na Alaska, mpe makelele ya nzasi ke na kuwakana, bawu vwandaka kwenda mbala mosi na lweka yina.

<sup>151</sup> Mpe ba-observatoire mpe bawu nyonso na Tucson ke na kuyufulaka dyaka, kusosa-sosa ya science ke na kumeka na kutala yinki ya kele. Na zulu mingi ti lubungi lendaka ve kuvwanda kuna, lubungi ya ngolo to kima mosi ve kuna na zulu. “Yinki yawu salaka? Wapi kisika yawu kele?” Bawu me vwalangana kaka samu na Halo yayi ya kimpeve me kangama kuna na zulu mutindu bawu vwandaka ntangu Bantu ya mayele kwisaka samu na kulanda Mbwetete, na kutubaka, “Wapi kisika Yandi kele yina me butuka Ntinu ya ba-Juif?” Yinki ya vwandaka? Nzambi ke na kulungisa Ndinga ya Yandi, “Mpe mbwetete mosi ke basika na Jacob.”

<sup>152</sup> Mpe Nzambi ya Mazulu silaka ti ntangu ya nkokila ke vwanda na Bansemo ya nkokila. Bamvula tatu me luta dinsweki yayi vwandaka profesu, “Wapi ntangu ya kele, Tata?” Kasi ntangu yayi ya kele disolo. Ya me luta. Nsilulu me lungisama. Yinki ntangu ya kele, tata, mpe yinki kele kubenda yayi? Nzambi ke na kulungisa Ndinga ya Yandi! Yandi kele mutindu mosi mazono, bubu yayi, mpe kukonda nsuka.

Beto sambila.

<sup>153</sup> Nzambi ya luzolo, mu me kanga bantu ntangu ya yinda, kulutila mingi ti mu banzaka. Mu ke sambila, Nzambi, ti kima mosi kutubamaka to salama yina ke nata bantu bisika nyonso na kubakula. Mpe na kumonaka mpe kubakula ti bawu lenda kwikila ti Nge kele Klisto ya kieleka, mpe Bandinga yina me siamisama kele nsiamisa ya Ndinga ya Yandi me kuma ya kulunga mpe me lungisama na nsungi ya Yawu.

<sup>154</sup> Ntangu yayi, Mfumu Yesu, na Bandinga ya Nge Mosi, Nge tubaka ti yinza ke vwanda mutindu Sodome. Beto zaba yawu, beto lenda tala yawu. Mpe Nge tubaka, na kilumbu yina, “Mutindu ya vwandaka na Sodome.” Ya vwandaka na minati-nsangu tatu yina ba fidisaka na Bantu ya makanda mpe na yinza ya ba-Hebreux. Mpe mosi ya bawu, yina vwandaka Nzambi Yandi mosi, Mwana ya muntu, monisamaka Yandi mosi na mutindu ya muntu mpe salaka kimangu mosi, na mutindu ti Yandi tubaka na Abraham yina Sarah vwandaka sala na manima ya Yandi na kati ya tenta.

<sup>155</sup> Nge tubaka ti ya ke salama diaka na ntangu yinza ya muvimba ya Bantu ya makanda ke vwanda mutindu Sodome. Mpe beto kele awa, Mfumu. Baprofesi yankaka vwandaka siamisa kima mosi, samu na kufidisa Elie na bilumbu ya nsuka, Mpeve ya Elie na zulu ya ntoto, samu na kunata bantima ya batata, to, “bana na batata.” Mpe mu ke sambila, Nzambi, ti ngunga yayi ti Nge ke siamisa Ndinga ya Nge, ti Nge kele mutindu mosi mazono, bubu yayi, mpe kukonda nsuka. Pesa yawu, Tata. Bawu nyonso kele ya Nge. Mu ke sambila ti Nge ke pesa balusakumunu yayi mpe kusiamisa yina me tubama, samu na Nkembo ya Nzambi. Na Nkumbu ya Yesu Klisto. Amen.

<sup>156</sup> Samu na kuzonza ndinga, ya kele muntu; samu na kusiamisa ndinga, ya kele Nzambi. Kutuba kima mosi, kele kima mosi; Nzambi na kusala yawu, kele kima yankaka. Nzambi kele na nsatu ya mutendudi mosi ve; Yandi ke salaka ntendulu ya Yandi Mosi.

<sup>157</sup> Ntangu yayi beto ke na kukubama na kuvwanda na ndonga ya bisambu, samu na kusambila samu na bambevo, kana Nzambi kuzola. Mpe beto zaba ti ya kele ve na mosi, bakala ve, kento ve, muntu ve, wanzio ve, yina lenda belusa beno, samu ti Nzambi me salaka yawu yimeni. Yandi kubamaka, kima mosi kaka beno fwana sala kele kuyamba yawu.

158 Ya kele na muntu ve, wanzio ve, kima mosi ve, Nzambi ve, Yandi mosi, lenda lemvo kila beno samu na masumu ya beno. Ya me salama dezia. Yesu salaka yawu na Kulunsi. Kasi ata mbala mosi ve ti ya ke kwenda na ntwala kima mosi, to ke sadisa beno kima mosi tii kuna beno ke ndima yawu. Beno me mona?

159 Kima mosi kaka lendaka salama, kele bantumunu yina Nzambi pesaka, samu na bakwikidi na kutentika maboko na zulu ya bambevo. Yawu yina salamaka na kati ya bansungi ba me sala yawu, na kati ya ba-reveil. Mpe ba me bokila yawu, “Nzambi.”

160 Abraham monaka bidimbu mingi. Kasi ya kwisaka ntangu mosi ntangu Abraham monaka kidimbu ya yandi ya nsuka, kaka na ntwala Sodome kuyokama na tiya, mpe yina vwandaka Nzambi ke kukimonikisa Yandi mosi na mutindu ya muntu. Beno ke kwikila yawu? Yesu tubaka ti ya ke salama diaka?

161 Ntangu yayi, bantu yikwa na kati awa... Mpe kuna na radio, to na télégramme na yinsi ya muvimba, kana beno ke na kuwa dyaka, beno kubama ntangu yayi samu na kisambu, beno sambila, mpe beno bayina kele na bamuswale yayi awa. Ntangu yayi, mu lenda ve kutuba na Nzambi yinki ya kusala. Ve, ntama na munu na kumekaka yawu. Yandi kele na kimpwanza; Yandi ke salaka yina Yandi zola. Mu lenda tumama kaka mpe lenda tuba kaka yina Yandi ke tuba.

162 Mpe ntangu yayi ba me telama pene-pene ya bibaka, bawu kele ya kutentama, ya kukangama. Mu ke kukiyufula kana beto lendaka lomba na Nzambi na zulu ya bandinga yayi, “Yinki kele kubenda yayi?” Kana Nzambi ke kwisa na kati ya beto diaka (ya lendaka vwanda na banzenza awa), mpe ke tambula na kati-kati ya beto mpe ke talisa kizizi ya Yandi ya lusakumunu na kati-kati ya beto, ke lakisa ti Mpeve ya Yandi kele awa, ke lakisa ti Yandi kele mutindu mosi mazono, bubu yayi, mpe kukonda nsuka, ti mosi na mosi ya beto (na manima ya Bansangu yayi zole ya ngolo) lendaka kwikila ti ya kele mutindu yina? Beno lenda sala yawu? Mbote mingi.

163 Na kisika ya kubokila ndonga ya bisambu, na yina; mwini kele ngolo, beto kele ya kukangama, beto kele ya kutelema na lweka ya kibaka. Mu ke tala na lweka *yayi*, samu na kubokila ndonga ya munu ya bisambu, beno lenda ve kusala yawu; beno tala, ya kutelama kuna. Mu lendaka bokila yawu mutindu *yayi*? Bambevo ya beno, bambeto ya bambevo, bima yankaka nionso, kele ya kutanda; beno lendaka ve kusala yawu. Na yawu beno vwanda kisika beno kele, mpe beno kwikila Nzambi. Kana beno kele na kalati ya bisambu, beno simba yawu, ya ke vwanda mbote. Beto ke kuma na beno kana beno zola kukwiza na ndonga. Kasi beno fwana kwisa ve na ndonga.

164 Ti Tata Shepherd, Lumingu me luta na nkokila, lutaka ata fioti ve na ndonga. Mu banza ve—mu banza ve ti yandi vwandaka

na kalati ya bisambu. Tata Shepherd kele awa na nkokila yayi? Wapi kisika yandi kele? Yandi kele awa? Yandi kele na manima. Nge kuzwaka kalati ya bisambu, Tata Shepherd? Nge kuzwaka yawu ve? Yandi kuzwaka yawu ve. Yandi kele ya kuvwanda kaka kuna dyaka, na nkokila yayi. Ya kele kisika ya mbote ya kuvwanda, Mpangi Shepherd.

<sup>165</sup> Ve kaka beno fwana vwanda kuna, kasi beno vwanda kaka na lukwikilu. Samu, beno bambuka moyo, mwa kento yina simbaka lele ya Yandi mpe Yandi kuwaka yawu. Mpe Yandi kele mutindu mosi mazono, bubu yayi, mpe kukonda nsuka. Mpe mukanda ya Hébreux, na Ngwisani ya Malu-malu, yandi tubaka ti Yandi kele Nganga-Nzambi ya Mbuta na nkokila yayi yina lenda “simbama na bansatu ya bimbevo ya beno.” Beno ke kwikila yawu? Beno vwanda na lukwikilu na ntangu yayi! Beno tula ntembe na Yawu ve. Beno kwikila Yawu, mpe ya ke salama. Beno lenda kuzwa yina beno—yina beno me lomba, kana beno lenda kwikila Yawu. Kasi beno fwana kwikila Yawu. Beno ke sala yawu? Beno nionso ke kwikila Yawu? Bantu yikwa ke kwikila Yawu ntangu yayi? Nzambi sakumuna beno.

<sup>166</sup> Mu zaba ve nani kele nani. Mu zaba ve mosi ya beno. Ya kele ve kisalu ya munu na kuzaba mosi ya beno. Ya kele kisalu ya Nzambi na kuzaba bima yayi. Kasi Yandi ke sala yawu kana beno ke kwikila Yawu. Beno ke kwikila Yawu ntangu yayi?

<sup>167</sup> Ntangu yayi, Nzambi ya Luzolo, ya kieleka beto kele ve nkonga ya Baklisto yina ba me vukisa, beto lendaka ve kuvwanda mutindu yina, muntu yina ba lendaka lengula mpe kubondila. Nge kele ve na mutindu yina, Mfumu. Nge kele na bakwikidi ya mambu ya ngolo. Mvwandulu ya kieleka ya Nzambi ke tulaka ntima ya muntu na tiya. Mutindu Abraham, yandi kwikilaka na Nzambi. Nge kukitalisaka Nge mosi na ntwala ya yandi, na manima Nge monikaka na yandi mpe salaka kidimbu, mpe yandi kwikilaka Nge. Nge vutulaka nzutu ya yandi na ntwenya ya bakala, mpe dyaka kento ya yandi, yina, kento ya yandi vwandaka kitini ya nzutu ya yandi mosi. Na manima kwisaka mwana ya malu-malu, mwana ya nsilulu.

<sup>168</sup> Nzambi, Nge silaka ti ya ke vwanda kima mutindu mosi na kilumbu yayi. Mu ke sambila ti Nge ke siamisa Ndinga yayi. Mpe beto ke kangama kaka na nsilulu yina kuna, ti ya ke vwanda mutindu ya vwandaka na Sodome, kaka na ntwala Sodome kuzika mpe lusambusu bulaka Sodome, yinza ya Bantu ya makanda. Na yina lufundusu ke na kukubama na kubula yinza ya Bantu ya makanda, mpe ba-Juif kuzwaka bamvula tatu mpe ndambu dyaka na ntangu ya Lukwamusu, bampasi ya Jacob, ndandani ya basabala makumi sambwadi ya Daniel. Kasi, ba me tanga bilumbu ya Bantu ya makanda, ya kele ntangu ya kukwenda. Mpe Nge me pesa kidimbu yina, mpe Nge me tuba ti ya ke vwanda dyaka. Pesa yawu, Nzambi. Bawu kele, beto kele

na maboko ya Nge, sala na beto mutindu Nge ke mona kele ya kulunga. Na Nkumbu ya Yesu Klisto. Amen.

<sup>169</sup> Ntangu yayi beno vwanda ve na kidi-kidi. Yinki ya zolaka vwanda kana mu vwandaka na kidi-kidi? Ntangu yayi, mu ke na kusala kima mosi awa ti ya fwana tala na kimpwanza ya Nzambi. Kasi samu na yinki mu ke sala yayi? Yandi tubaka ti ya ke vwanda. Yina ke sukisa dyambu. Mpe kana Yandi ke sala Yandi mosi yina, me siamisama mutindu yina na ntwala ya beno, mbote, beno lenda kwikila Yandi ve? Kieleka. Beno vwanda kaka na lukwikilu ntangu yayi mpe beno kwikila.

Bika mu tala kaka na nziunga, mu mona kisika Mpeve-Santu ke twadisa, yina Yandi ke sala. Mu zaba ve yina Yandi ke sala, yina me tadila Yandi. Kasi kana beno ke vwanda kaka na lukwikilu, beno kwikila kaka, “Mambu nionso ke salama na bayina ke kwikila.” Beno nionso ke kwikila yawu, beno telemisa maboko ya beno mpe beno tuba, “Mu ke kwikila Yawu.” [Dibuundu me tuba, “Mu ke kwikila Yawu.”—Mu.] Na ntima ya munu ya muvimba, mu ke kwikila Yawu.

<sup>170</sup> Ntangu yayi tatu ke vwanda nsiamisa, kana Yandi ke sala yawu bambala tatu ya kusungama, samu na kusiamisa beno ti Yawu kele kieleka. Mu ke kipe ve kisika beno kele, nani beno kele, beno vwanda kaka na lukwikilu mpe beno kwikila. Ntangu yayi, beno—beno ningana ve. Mutindu *yayi*.

<sup>171</sup> Mama, ke sambila, mu zaba nge ve. Vwanda kaka kisika nge kele; nge fwana kwiza ve. Mu zaba nge ve, kasi nge me simba mwana-kento ya fioti na diboko ya nge, to na makulu ya nge. Mu kele nzenza ya muvimba samu na nge. Mpe mwana-kento yayi ya ntwenia ke monana mbote, yandi ke monana mbote. Yandi kele mwa mwana ya kento ya kitoko, mwa mwana ya kento ya bansuki ya mbwaki. Mu ke tala yandi awa, yandi ke monana ve mutindu ti yandi kele kikata to kima mosi. Mu zaba ve yina ke tambula mbote ve na yandi. Ya lendaka vwanda ve samu na mwana; ya lendaka vwanda samu na nge. Kasi mu me mona ti nge me vwanda kuna na mwana yina, mpe ke sambila. Mu fwana solula na nge mwa ntangu fioti, samu na kusimba mpeve ya nge, mutindu Yesu tubaka na kento yina, “Natina Munu masa ya kunwa,” beno me mona, kaka samu na kuzaba—kaka samu na kuzaba muntu mosi. Mpangi Bryant mpe bayankaka ya kuvwanda awa, mu zaba bantu yayi kele ya kuvwanda awa. Bawu lenda vwanda na nsatu, mpe, kasi nge vwandaka nzenza samu na munu.

<sup>172</sup> Nge ke kwikila ti mu kele profete ya Nzambi? Nge ke kwikila ti bima yayi yina nge me kuwa na nkokila yayi kele Kieleka? Ntangu yayi, kana Nzambi ke talisa na munu kima yina nge me sala, to kima yina nge zolaka sala ve, to kima yina ke tambula mbote ve na nge, to yina kele nsatu ya nge, nge ke zaba kana ya kele kieleka to ve. Nge zola ve? Mpe kana Yandi ke sala yawu, ya ke siamisa Ndinga ya Yandi ti Yandi kele mutindu mosi mazono,



bubu yayi, mpe kukonda nsuka, mpe ti Santu Luc 17:30 me monisama? Beno ke kwikila Yawu?

<sup>173</sup> Ntangu yayi, mama yayi me telemisa diboko ya yandi ti beto kele banzenza. Mu zaba nge ve, kasi mu ke na kumeka na kukutana na mpeve ya yandi, ya muntu mosi. Ya kele na mingi ya beno yina ke na kubenda. Ntangu yayi, beno ke kwikila Yayi na ntima ya beno ya muvimba.

Ntangu yayi, ya kele samu na mwana ya kento ya ntwenya. Ya kele nge ve. Nge kele na kidi-kidi, kasi ya kele ve kidi-kidi yina ke na kukwamisa nge. Kima ya nene na ntima ya nge kele mwana-kento yina ya ntwenia. Mpe nge ke kwikila ti Nzambi lenda tuba na munu yina yawu kele? Nge ke kwikila yawu? Ya ke sadisa nge, nge ke kwikila na ntangu yina? Ya kele kimbevo ya yintu. Ya kieleka? Ntangu yayi tula diboko ya nge na zulu ya yintu ya mwana yayi ya fioti; diboko ya nge.

<sup>174</sup> Nzambi ya luzolo, Nge tubaka, “Bidimbu yayi ke landa bayina ke kwikila. Bawu ke tentika maboko ya bawu na zulu ya bambevo, mpe bawu ke beluka.” Kento yango kele mukwikidi. Diboko ya yandi kele na zulu ya mwana yango. Bika yandi beluka. Na Nkumbu ya Yesu Klisto, mu ke pesa kisambu yayi. Amen.

<sup>175</sup> Ntangu yayi beno ke kwikila, beno nionso? Kana beno lenda kwikila, mambu nionso ke salama. Ya kieleka!

<sup>176</sup> Mu zaba mama yina kele ya kuvwanda pene-pene na yandi, kasi yandi kele ya kieleka mingi ti yandi ke na kutalaka mutindu yayi. Mu lenda ve kubokila nkumbu ya yandi, kasi mu . . . Kana mu tala yandi minuti mosi, mu ke zaba. Kasi mu zaba kento yina na kutala, kasi mu zaba ve yina kele mpasi ya nge. Nge ke kwikila ti mu . . . Nzambi ke bika munu kuzaba yina kele mpasi ya nge? Nge ke . . . Yawu ke sadisa nge? Diabete ya sukadi. Ntangu yayi, kana ya kele kieleka, beno telemisa diboko ya beno. Kieleka!

<sup>177</sup> Ya me salama ti mama yina vwandaka ya kulala . . . ya kuvwanda pene-pene ya nge, yandi kele na kima mutindu mosi. Yandi kele nzenza. Mama yankaka yina ke sambila samu na muntu mosi, mwana ya kikata. Nge ke kwikila na ntima ya nge ya muvimba, Nzambi ke pesa yawu.

<sup>178</sup> Muntu mosi na manima awa. Bakala mosi me vwanda kuna, ke meka na kumanga makaya. Nge ke kwikila ti Nzambi ke katula yawu na nge? Mbote mingi. Nge ke kwikila? Nge lenda kuzwa yawu. Mu me monaka ntete ve muntu yina na luzingu ya munu.

<sup>179</sup> Awa kele bakala mosi. Beno me mona kivudi yina ya ndombe na zulu ya bakala yayi kaka awa yina kele ya kulala mutindu na mbeto ya bambevo, to kiti mosi? Yandi ke na kufwa. Yandi me fikama na kivudi. Yandi ke na cancer. Mu zaba bakala yayi ve, mu me monaka yandi ata fioti ve. Nzambi zaba nionso samu na nge. Ya kele kieleka, tata. Nge ke kwikila ti Nzambi lendaka

tuba na munu kima mosi samu na nge? Ya ke sadisa nge na kuzwa kubeluka ya nge? [Mpangi-bakala me tuba, “Yinga, mu ke kwikila yawu.”—Mu.] Ba nataka nge awa na nkundi mosi. Kasi beno kele ve ya awa, beno kele kisika mosi kisika ya kele na nzutu ya nene ya maza kisika bantu ke lobaka bambisi. Yinga, Albany, na Kentucky. Ya kele kieleka. Kwikila, mpe nge lenda vutuka na yinzo, mbote. Kwikila ti ya me kwenda. Kana nge ke kwikila Yawu! Nge fwana kwikila Yawu, mpe kwikila ti ya me salama samu na nge. Nge ke kwikila?

<sup>180</sup> Beno, ya Tennessee, beno kele na mwana-bakala yina kele na asthme. Yandi kele awa ve, kasi beno ke kwikila ti yandi ke beluka? Na yina beno baka muswale ya beno, ya beno . . . na diboko ya beno kuna, beno nata yawu na yandi. Yandi ke beluka kana beno ke kwikila Yawu.

<sup>181</sup> Mama yayi vwandaka dila, ya kuvwanda kuna na lweka ya kuswaswana na Docteur Vaÿle. Yandi me fikama na kivudi, diaka, kivudi ya ndombe. Mu me monaka ntete ve kento yayi na luzingu ya munu, kasi yandi kele na cancer. Yandi ke kufwa kana kima mosi me salama ve samu na yandi. Nge ke kwikila ti Yandi ke belusa nge, mama? Nge lenda? Beno lenda kuzwa kubeluka ya beno, kana beno ke kwikila kaka.

<sup>182</sup> Ya kele na mama mosi ya ntwenya ya kuvwanda kaka na manima ya yandi na muswale mosi na zulu ya yinwa ya yandi. Yandi mpe kele na bamputa na kifundu, yandi kele mbevo. Nge ke na kuzimbisaka mabanza, balunziungu, bakubwa ngambu. Muntu mosi nataka nge awa. Nge ke na kimbevo ya bakento. Kana nge ke kwikila, nge lenda kwenda na yinzo, nge ke beluka.

<sup>183</sup> Nge, ntwenya ya bakala, nge kele nzenza; ya kuvwanda kaka awa na ntuala ya munu, nge vwanda tala munu. Yinki nge kele, muntu ya Porto Rico to kima mosi? Yinga, yina mu zola kutuba, yina mu zola kutuba, mu kele nzenza samu na nge. Nge zaba yawu; nge me katuka ve na yinsi ya munu. Kasi nge ke kwikila ti Nzambi lenda pesa nge nsatu ya ntima ya nge? Kana mu ke tuba na nge yina kele nsatu ya nge, nge ke kuzwa yawu? Nge ke na kusosaka mbotika ya Mpeve-Santu. Ya kele kieleka. Baka Mpeve-Santu, mpangi ya munu ya bakala.

<sup>184</sup> Awa kele bakala ya ndombe ya kuvwanda na lweka awa, yina kele na kizitu na ntima ya yandi. Ya kele samu na kento ya yandi. Kento kele awa ve, mpe. Yandi ke na mpasi na makulu ya yandi. Nge ke kwikila ti Yandi ke belusa yandi? Nge ke kwikila yawu? Nge kele nzenza awa. Nge me katuka na simu ya nzadi. Nge me katuka na Jamaïque. Nge ke kwikila ti Nzambi lenda tuba na munu nani nge kele? Tata Brady. Nge ke kwikila? Yesu Klisto kele mutindu mosi mazono, bubu yayi, mpe kukonda nsuka.

<sup>185</sup> Mama yayi me vwanda kuna na manima na nsuka *yayi*, na lweka ya Mama Wright kuna, yandi kele na kizitu na ntima ya yandi. Yandi ke sambila samu na mwana-kento. Yandi me

kubama samu na lipaso. Nge ke kwikila na ntima ya nge ya muvimba, samu na yandi? Yandi ke na nsatu ya yawu ve kana nge ke nata yandi na kukwikila Yawu. Mu lenda belusa ve.

<sup>186</sup> Kuna na manima na kati ya kivinga ya ba-bébé, mu ke mona Mpeve ya Mfumu, Wanzio mosi, Nsemo mosi ke tambula na kati ya kivinga ya ba-bébé. Ya kele na zulu ya ntwenya ya kento, mpe yandi kele na kimbevo ya kimpeve yina yandi ke na kukiyufula. Ya ke monana ti mu fwana zaba kento yayi, na mutindu nionso, kento ya ntwenia. Yandi kele diaka na kimbevo ya bakento. Yinga. Nkumbu ya yandi kele Mama West, na Alabama, Mama David West. Kwikila; Nzambi ke pesa yawu na nge.

<sup>187</sup> “Ya ke vwanda na Nsemo, mpe na kilumbu yina ntangu Mwana ya muntu ke monisama.” Kana ya kele ve Yesu Klisto mutindu mosi mazono, bubu yayi, mpe kukonda nsuka, mu zaba kima mosi ve samu na Yawu. Beno ke kwikila Yawu? Nyonso lenda salama na bayina ke kwikila.

<sup>188</sup> Kuna na bayina ke na kuwa na nzila ya ba-microphone na yinsi ya muvimba ntangu yayi, mpe na tabernacle yayi, bantu yikwa na kati ya beno ke telemisa maboko ya beno mpe ke tuba, “Mu kele mukwikidi”? Ntangu yayi, beno yina kele kuna na kati ya bayinsi, muntu nyonso me telemisa maboko ya bawu, awa. Mpe kuna, na kati kisika mosi kuna na yinsi, beno me telemisa maboko ya beno, kukondwa ntembe. Ntangu yayi beno kanga meso ya beno, beno tentika kaka maboko ya beno na zulu ya muntu yina kele pene-pene ya beno. Beno simba diboko ya bawu. Beno tentika yawu na zulu ya dipeka ya bawu. Mu me tentika maboko ya munu na zulu ya bamuswale. Beno tala yina me salama bubu yayi! Beno tala yina me salama ntangu yayi.

Na kutalaka kizizi ya Yandi ya santu  
Kulezima na zola ya Kinzambi;  
Bayina ke vwanda ya kusakumuna na lemvo ya  
Yandi,  
Mutindu misanga na yimpu ya Yandi ke lezima.

Ntangu yayi beno sambila. Beto sambila, bisika nyonso.

<sup>189</sup> Nzambi ya luzolo, ngunga me lunga. Yinki zola kutuba yayi? Nzambi ke na kulungisa Ndinga ya Yandi! Yinki kele kubenda yayi, Mfumu? Ya kele Nzambi ke na kulungisa Ndinga ya Yandi. Yinki yayi kele bisika nyonso na yinsi, na nzila ya médium ya allo-allo, ti bankama ya bantu me tentika maboko ya bawu na zulu ya mosi na yankaka bisika nyonso na yinsi, kubanda na simu mosi tii na yankaka, kubanda na Node tii na Sude, na Este tii na Weste? Awa kele ya kuvwanda bantu awa yina me katuka na bayinsi ya nzenza, mingi ya etats-Unis, Mexique, Canada, mpe beto me tentika maboko ya beto na zulu ya mosi na yankaka. Nzambi ke na kulungisa Ndinga ya Yandi!

<sup>190</sup> Wapi mutindu ti muntu mosi lendaka telama awa na nzila ya Mpeve-Santu mpe kubokila muntu mutindu Yandi salaka na

Simon Pierre, “Nkumbu ya nge kele Simon, nge kele mwana ya Jonas”?

“Kwenda baka bakala ya nge mpe beno kwiza awa.”

“Mu ke na bakala ve.”

“Kieleka. Nge kele na tanu.”

<sup>191</sup> Yandi tubaka, “Mu zaba ti Mesiya ke kwisa sala yayi, kasi Nani Nge kele?”

Yandi tubaka, “Mu kele Yandi.”

<sup>192</sup> Mpe Nge kele mutindu mosi mazono, bubu yayi, mpe kukonda nsuka. Mpe Nge silaka, “Beni mpe ke sala bisalu yina Mu ke sala. Beni ke sala ya kulutula yayi, samu Mu ke kwenda na Tata.” “Mpe, tala, na bilumbu ya nsuka Mu ke tinda nge Elie, profete, mpe yandi ke soba mabanza ya bantu, ke vutula bantima ya bana na Malongi ya bantumwa ya Biblia.” “Mpe ya ke vwanda na Nsemo na ntangu ya nkokila.”

<sup>193</sup> Beto bawu yayi, Nzambi ya nene ya Mazulu! Ngunga kele awa! Maboko kele na zulu ya bantu.

<sup>194</sup> Satana, ba me nunga nge. Nge kele muntu ya luvunu. Mpe, mutindu kisadi ya Nzambi, mpe mutindu bisadi, beto ke tuma yawu na Nkumbu ya Yesu Klisto, ti nge tumama na Ndinga ya Nzambi, mpe basika na bantu, samu ti ya kele ya kusonika, “Na Nkumbu ya Munu ba ke basisa bampeve ya yimbi.”

<sup>195</sup> Mpe bantu nionso lendaka vwanda na kimpwanza. Pesa yawu, Nzambi ya Luzolo. Nge kele Nzambi ya Mazulu yina nungaka, kilumbu yina na kubenda na zulu ya Mongo Calvaire, bimbevo nyonso mpe maladi mpe bisalu nyonso ya dyabulu. Nge kele Nzambi. Mpe bantu me beluka na banyuta ya Nge. Ba kele na kimpwanza. Na Nkumbu ya Yesu Klisto. Amen.

<sup>196</sup> Nzambi, konso muswale yina ba me tula awa, na yina Mpeve ya Nzambi kele awa, na yina kupakulama ya Yesu Klisto kele na zulu ya bantu, mpe bidimbu ya nene yina Yandi silaka me lungisama, mpe ntoto ke tekita, kuningana ya ntoto ke na kusalamaka, bidimbu ya nene yina Yandi tubaka, mpe Masonuku me lungisama, mpe Nsemo ya nkokila ke sema. Mu ke tula nzutu ya munu na zulu ya bamuswale yayi, na kumonikisaka nzutu ya muvimba yayi ya mikwikidi na Esete, na Wesete, na Node, mpe na Sude; mpe kutuba na dyabulu, “Na Nkumbu ya Yesu Klisto, bika konso mbevo yayi yina kele ya kulala,” samu na lukumu mpe nkembo ya Ndinga ya Nzambi. Na Nkumbu ya Ndinga ya Nzambi, Yesu Klisto ya Nazareth. Amen.

<sup>197</sup> Ntangu yayi, na malembe nionso, na lembami nionso, na busantu nionso, mpe na mabanza ya beno ya mbote, mutindu mikwikidi, beno me kwikila ntangu yayi mpe me ndima kubeluka ya beno na Nzambi ya Ngolo nionso, na Nkumbu ya Yesu Klisto? Kana beno sala yawu, beno telemisa maboko ya beno. Bisika nionso na bayinsi, beno telemisa maboko ya beno

kuna na zulu. Muntu nyonso na kati awa, landila mutindu mu lenda mona, vwandaka na maboko ya bawu na zulu; na kati, na ngaanda, na lweka ya banela, na kati ya bielo, na kati ya kivinga ya ba-bébé, mpe bisika nyonso, bantu na maboko ya bawu na zulu. Bawu ke ndima Yawu. Satana me nungama! Bamputa ya Yesu Klisto ke belusa beno, mpe Mvwandulu ya Yesu Klisto ke siamisa dyambu ti Yandi ke na kuzinga bubu yayi, na kiyeka ya kuzitisa konso nsilulu yina Yandi salaka. Amen! Mu ke kwikila Yandi. Beno ve? [Dibuundu me tuba, "Amen."—Mu.]

<sup>198</sup> Ntangu yayi beto telama. Na Nkumbu ya Mfumum Yesu, na kundimaka nyonso yina me salama to me tubama, beto zola Yandi na bantima ya beto nyonso. Beto ke zolaka Yandi na nyonso yina kele na kati ya beto. Ntangu yayi na yina beno ke kwenda na bayinzo ya beno ya kuswaswana na nkokila yayi, Nzambi ke kwenda na beno. Nzambi ke pesa beno Mpeve-Santu kana beno kele ve na Mpeve-Santu.

<sup>199</sup> Bakala nyonso, kento, mwana ya bakala, to mwana ya kento, awa, yina me bakaka mbotika ve na Nkumbu ya Yesu Klisto, ya kele na bilele, na kiziba. Beno nata ve mbasi yina lendaka salama bubu yayi. Mbasi lendaka vwanda me luta mingi. "Konso kilumbu, konso kilumbu, kele na diambu ya yawu." Ya kele na balongi ya kutelama, yina ke na kuingila, bilele ke na kuingila. Esikize kele ve. Beno ke na kuingila? Kana beno kele mutindu yina, beno ke kwikila. Ata wapi mutindu ba botikaka beno, ba mwangisaka beno mwa maza, ba tsyemunaka yawu, nyonso yina ya kele, ya kele kifu. Nsemo me kwiza. Kwiza, kwikila, mpe baka mbotika.

<sup>200</sup> Muntu nyonso yina me kondwa Mpeve-Santu, ti beno zola kuzwa Mpeve-Santu, mosi na mosi ya beno, na ngolo ya muvimba ya Kinzambi mpe zola ti Yandi silaka beno, samu na kusala beno kivangu ya malu-malu na kati ya Yandi. Nzambi sakumuna beno.

<sup>201</sup> Ntangu yayi, tii Lumingi ke kwiza na suka na ngunga ya yivwa na ndambu, beto yimba mwa nkunga yayi yina beto vwanda yimbaka bamvula me luta:

Beno zimbana ve kisambu na dibuta,  
 Yesu ke zola kukutana na beno kuna;  
 Yandi ke katula mawa ya beno nyonso,  
 Beno zimbana ve kisambu ya dibuta.

Beto yimba yawu kintwadi ntangu yayi.

Beno zimbana ve kisambu na dibuta,  
 Yesu ke zola kukutana na beno kuna;  
 Yandi ke katula mawa ya beno nyonso,  
 Oh, beno zimbana ve bisambu na dibuta.

<sup>202</sup> Ntangu yayi na yina beto ke yimba dyaka yawu, beno pesana mbote na kizyeti yina kele na lweka ya beno, beno me mona, na yina beto ke yimba yawu.

Beno zimbana ve kisambu na dibuta,  
 Oh, Yesu zola kukutana na beno kuna;  
 Yandi ke katula mawa ya beno nionso,  
 Oh, beno zimbana ve bisambu na dibuta.

203 Beno zola Yandi ve?

Mu zola Yandi, mu zola Yandi  
 Samu Yandi zolaka munu ntete  
 Mpe sumbaka mpulusu ya munu (Yina  
 vwandaka kubenda.)  
 Na Mongo ya Calvaire.

Kubenda ya mutindu mosi na zulu ya Mongo Sunset, Mongo Nebo, Mongo Sinai, banzingulu yayi nionso salamaka na zulu ya myongo yayi. Na yina, mbote mingi, beto yimba yawu ntangu yayi.

Mu zola Yandi, mu zola Yandi  
 Samu Yandi zolaka munu ntete  
 Mpe sumbaka . . . mpulusu  
 Na yinti ya Calvaire.

204 Bayina nionso ke zolaka Yandi, beno tuba, “Amen.” [Dibuundu me tuba, “Amen.”—Mu.] Ya vwanda mutindu yina! Ntangu yayi beno banza kaka na yina Yandi salaka samu na beno; beno banza, ti beno lendaka vwanda kuna na nganda na kivinga ya nganda na nkokila yayi. Na kutala beno zolaka vwanda na ndyamu mutindu mu zolaka vwanda, na ngaanda ya kyadi ya Nzambi. Yinki Yandi salaka samu na beno? Oh, wapi mutindu beto lendaka kangama na zola ya Yandi? Ya ke sala ata luswaswanu ve na yina muntu nyonso ke tuba, Yandi kele ya ntete.


205 Beto kanga meso ya beto, mpe beto kulumusa bayintu ya beto na yina beto ke yimba yawu samu na Yandi ntangu yayi. Yandi ke zolaka bankunga, mikunga. Beto yimba yawu samu na Yandi ntangu yayi.

Mu zola Yandi, mu zola Yandi  
 Samu Yandi zolaka munu ntete  
 Mpe sumbaka mpulusu ya munu  
 Na yinti ya Calvaire.

206 Na bayintu ya beto mpe bantima ya beto ya kukulumusa na Mvwandulu ya Yandi, beto ke vutula matondo samu na yina meso ya beto me mona, yina makutu ya beto me kuwa, yina ba ke na kubaka na bande na Ndinga ya Nzambi, yina nsilulu ya Yandi me vwanda samu na beto bubu yayi. Nzambi sakumuna beno.

207 Beto kele na nzenza na beto na nkokila yayi, mpangi-bakala mosi, Ned Iverson, mulongi ya Presbytérien ya ntama. Tata ya yandi, bampangi ya yandi, kele milongi ya Presbytérien. Yandi, mu me bakula, kuzwaka mbotika bubu yayi, dyaka, na Nkumbu ya Yesu Klisto. Yandi kele mulongi, mpe muntu ya

mbote na yawu. Mpe ntangu yayi mu ke yufula yandi, na yina mu ke kwikila ti yandi kele bisadi ya Nzambi, samu na kulomba balusakumunu ya Nzambi na zulu ya dibuundu yayi na yina beno ke vutuka na yinzo ya beno.

<sup>208</sup> Mpangi Iverson, kwiza na ntwala, na yina beto kele na bayintu ya beto ya kukulumusa samu na kisambu. Nzambi sakumuna nge, mpangi ya munu ya bakala. 

*YINKI KELE KUBENDA YAYI NA ZULU YA MONGO? KNG65-0725E*

(What Is The Attraction On The Mountain?)

Nsangu yayi ya Mpangi William Marrion Branham, kulongamaka na Kingelesi, na Lumingu na nkokila, na kilumbu ya 25 ya Ngonda ya sambwadi, na mvula 1965, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2023 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)



## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)